


石柱記



清霽鄭蒞畦箋釋

顏魯公石

柱記

五卷

魚計亭雕版

吳興山水秀麗人文輻輳治博士家言之外兼該古學
家有藏書予往在試院有句云書肆架多陳汲冢儒林
家自握靈珠紀其盛也蒞畦鄭子予兩試俱高等以郡
志殘闕芻蕘博考成一百二十卷向已歎其該洽今來
淮上示予箋釋石柱記一編魯公宦轍所屆多冥揆勝
蹟如麻姑碑華嶽廟石幢不可數記大抵忠孝人必具
真性情所值山川人物未有浮雲過眼如郡有錫山而
不知者雖其中間有譌誤恐亦如子瞻以赤鼻為赤壁
借以張所寓之邦不足深辨也鄭子抽其腹笥引而伸
之亦已勤矣予老且憊度不復與吳興山水人文作緣
對此編泫然點筆而為之序康熙歲次壬午五月旣望

湖州石柱在宋初字已漫漶歐陽永叔謂其筆畫奇偉
非顏魯公不能書於是宋次道集魯公詩文刊於金石
者編成一十五卷則石柱記存焉孫莘老知湖州聚境
內碑碣築墨妙亭貯之凡三十二通記其一也所記山
川陵墓廟宅旁及屏風竹帳雉尾扇顧唐設五縣而記
遺其二或當日有之次道編集時殘闕未可知爾吾友
鄭子芷畦既輯府志一百二十卷成又箋釋石柱記四
卷復商之子補遺一卷考證詳覈可稱周見洽聞矣墨
妙亭之建蘇子瞻為之記一時詩流寄題踵至今其遺
石因府治卑溼用填淤泥已久夫峴山之碑一沈江底
尚覲其深谷為陵若亭中諸碑未淪於水假有賢太守
發而復樹之何難與莘老竝美又安見石柱之不可再
觀乎竹垞老人朱彝尊

曩子視浙學七十二城紛紛上地志偶檢閱之蕪穢紕
繆不一而足吳興尤甚族子蒞畦醞釀經史叔為郡志
發凡起例一洗前志之陋己卯冬弭檝霅川已樂觀其
成書今開正上浣來自秦郵將渡河北上金臺留飲十
日酒酣耳熱之頃問其志何以不梓蒞畦告子曰某之
為是書也大約憑史不憑志循理不循情略舉一二如
沈約弑其君舊志尊為名賢之冠春秋血食沈文叔一
門忠孝舊志削而不書予竝表出之近世有兩烈婦焉
一王烈婦夫亡棄孀姑襁祿諸兒自溺死一孫烈婦夫
亡孑然一身不食七日死予獨為孫作傳一時賢王者
雖多方陳請不少回夫是以譁然議論蠡起不知者以

鄭序

為改竄舊本殆不可信也其知者以為不虛美不隱惡
史體也而非志體也於是遂不果梓予聞之矍然因喟
直道之難行也夫太史之簡董狐之筆千古能有幾人
而欲踵其事而為之其不為造物者所忌蓋亦鮮矣顧
以子之才品不羣不屑寄人籬下甘自留落既難見信
於有司又不獲告無罪於鄉井子何徒自苦少陵詩云
本賣文為活翻令室倒懸子第安於所遇而已而何此
中技癢終不能自己又箋釋石柱記將布諸黎以序見
屬不辭而為之詞且慰之曰此不過湖志之一斑耳姑
先行之全志具在當世不乏知音必不久闕笥中徒飽
蠹魚之腹也晉安愚叔開極題

顏正烈文忠公泐吳興山川陵墓古蹟於石柱樹杼山
年遠剝落孫莘老取而貯之墨妙亭更六百餘禩竟歸
銷滅鄭子蒞畦按得真本補亡訂譌箋釋盡善予旅寓
秦郵蒞畦輕舟來訪出一編見示亟讀之覺山明水秀
酒芙蓉茶香歷歷在我目前秦郵去吳興雖隔越江湖然
俱禹貢揚州之域莘老以郵人典湖郡收殘拾廢志在
不朽予今居其故里秋清月白尋珠光於甃社之陰當
開蒞畦所貽下若春呼莘老而弔之曰石柱記鄭子已
箋釋之矣行將有事於吾公墨妙亭小志莘老雖遙當
必聞聲而輟然笑也蘿邨蔣國祥

志吳興者張玄之山墟名王韶之郡疏山謙之記張文
規雜錄陸羽圖經顧雲總裁陸龜蒙實錄左文質統記
紹興續圖經淳熙舊編皆郡官寄公所作非生長於湖
者安能備悉湖事今諸書不槩見宋嘉泰中樞密院編
修談鑰始以郡人志郡事而陳振孫譏其書草率未得
盡善明成化志訓導陳頎作嘉靖志訓導浦南金作萬
曆志假託爲唐一菴作掌故集華亭徐獻忠作相沿舛
錯莫可徵信頃借書醜舫得宋槧石柱記載山川陵墓
亡者三之一其存而不可信者亦三之一吾湖浙西佳
郡何不幸而使數千百年文獻無徵至於此極邪竹垞
先生惜其殘闕爲補記二縣旣完且好余乃一一箋釋

自序

證其所可信復辨其所不可信甫脫橐先生見之賞擊
命鈔副本藏曝書亭辛巳七月晦日歸安鄭元慶識
三年築舍人莫不嫻之余作志且七八年成而弄之匪
衍則與不成何異用是愴怳不得意去冬典書兩大麓
作汗漫之遊孟城卒歲橐中裝盡矣復寄食淮陰會吾
師張石虹先生纂格物外編不廢芻蕘甚許可是書以
謂辭不費而指頗深遠數將蒼剗木歸商之同好咸鼓
舞開雕匝月而竣嗟乎吾半世精神積年視聽豈僅託
於是乎管窺蠡測戔戔自慙夫亦曰不賢者識其小者
而已壬午日長至桑苧園南鄰處士載書於吳閭之白
蓮華涇

石柱記

唐金紫光祿大夫行湖州刺史上柱國魯郡開國公顏真卿撰

烏程縣

舊繁今望鄉四十里二百東去蘇州二百一十里南去杭州一百八十九里西北去揚州六百四十七里西去宣州三百一十七里北去東都二千八百七十五里北去上都三千七百七十六里

帝顓頊冢

吳大帝陵

吳景帝陵

石柱記

鈕皇后陵

吳丹陽太守蕪湖侯太史慈墓

吳大將軍朱治墓

吳蕩寇將軍程普墓

晉侍中羅含墓

晉黃門侍郎潘尼墓

齊宣城太守丘靈鞠墓

梁中書侍郎丘遲墓

梁司空康絢纘墓

陳五兵尚書康宗墓

長城縣

大雷山

芳巖

震澤

若溪

吳王夫槩廟

陳景帝陵

陳錢皇后陵

陳昭烈王陵

謝安墓

殷仲文墓

陳武帝故宅

石柱記

二

陳文帝故宅

吳均故宅

陳氏五主屏風

陳高祖竹帳

國朝高僧南山律主道宣

安吉縣

天目山

崑山

橫溪

梅溪

蛟龍池

翔鳳林

裴子野故宅

周弘讓故宅

姚萇雉尾扇

施世瑛金鐘

山川

卞山

法華寺

金井

玉澗

乳竇

石膏

溫泉

項王走馬埒

項王飲馬池

項王繫馬石

衡山

帝顓頊冢

春秋鳩茲城

石柱記

三

峴山

顯亭

故別駕李適之石酒罇

五花亭

杼山

妙喜寺

黃浦橋

避它城

何楷釣臺

昇山

吳均入東記

晉吳興太守王羲之烏亭

金蓋山

何氏書堂

張邵丘道祚禪幽寺

太湖

周迴四萬八千頃

雲溪

白蘋洲

石柱記

石柱記

四

石柱記

皇朝 日講官 起居注翰林院檢討直 南書房秀水朱彝尊補

德清縣

市亭山

金鷺山

吳羗山

餘不溪

北流水

苧溪

餘不亭侯廟

梁吏部尚書沈約墓

石柱記

孝鷺冢

武康縣

防風山

武康山

七里嶠

前溪

阮公溪

郭先生祠堂

沈道虔石山精舍

吳太常卿姚信墓

晉吏部尚書沈嘉墓

晉揚威將軍東陽太守沈勁墓
宋吏部尚書沈演之墓

石柱記

石柱記

二

石柱記卷一

荻溪 章廷宏 審定
藍畦 鄭元慶 箋釋

湖州石柱記文字殘缺其存者僅可識讀考其所記不可詳也唯是筆畫奇偉非顏魯公不能書耳公忠義之節明若日月堅如金石自可以光後世傳無窮不待其書然後不朽然公所至必有遺跡故今處處有之唐人筆蹟見於今者唯公最多視其鉅書深刻或託於山厓其用意未嘗不為無窮計也蓋亦有趣好所樂爾其在湖州所書為世所傳者唯干祿字書放生池碑尚多見於人家而干

石柱記卷一

祿字書乃楊漢公墓本其真本以訛缺遂不復傳獨予集錄有之唯好古之士知前人用意之深則其湮沈磨滅之餘尤為可惜者也

集古錄

石柱記殘缺不見年月及書撰姓名其字畫顏魯公書也凡湖州諸縣皆記其山川前古陵墓

集古錄目

石柱記舊在杼山今在墨妙亭

輿地碑記目

按魯公年譜大曆七年壬子公年六十四九月至東京除湖州刺史十一月發東京八年癸丑正月至任七月遣建放生池碑銘是年有題三癸亭酬陸處士折青桂花見寄詩水堂送諸文士戲贈潘丞聯句十二月有沈氏述祖德碑陰記玄靖李先生碑銘公在郡及門生弟姪遊峴山觀左相石罇聯句九年甲寅正月作干祿字書序書於刺史宅東廳院韻海鏡源纂成三百六十卷是年有乞御書題額恩敕批荅碑陰記妙喜寺碑世傳碑文作于贈僧皎然詩十年乙卯有元次山表墓碑銘歐陽領軍碑銘十一年丙辰四月有崔孝公陋室銘記初雲溪東南有白蘋洲梁太守柳惲江南曲汀洲采白蘋日暮江南春後人因以名洲至是公始剪榛導流作八角亭及茅亭書惲詩於上有康使君碑銘十二年

丁巳公年六十九四月有柳惲西亭記是月內名五月有項王碑陰述
吳興集集中載錢別之文及詞客唱和之八月為刑部尚書年譜所載魯公刺湖事
績如此獨不及石柱記故不知其作於何年考之唐會要烏程縣大曆
十二年二月二十一日新陞望公記烏程注云舊縣今望則知其為十
二年二月後所作也時公膺召尅期進都猶留心郡事勒之貞石用垂
久遠更數百年風雨剝蝕蕪沒荒山非孫莘老力為收貯幾乎不與蠶
頭鼠尾碑胥歸銷滅也邪謹識之見魯
公用意之深且以補年譜所未逮云

湖州沿革

湖州禹貢揚州之域斗牛之分

清類天文分野之書

古防風氏之國也春秋時吳地後屬越越為楚所

滅屬楚

十道志

楚為菰城即春申君之邑

方輿勝覽

秦始皇二十六年置會稽郡改菰城為烏程縣隸

會稽又置故鄣縣隸鄣郡

吳興記

石柱記卷一

二

秦始皇至會稽徙大越之人于烏程

越絕外傳

烏程故鄣漢屬會稽丹陽二郡東漢屬吳郡吳孫

皓分置吳興郡晉宋齊因之

輿地廣記

梁紹泰元年改吳興郡為震州蓋取震澤為名陳

初罷州復為郡

元和郡縣志

隋仁壽二年改吳興郡為湖州

太平寰宇記

五湖之表州以為名也

郡國志

隋煬帝初廢湖州分其地入餘杭及吳二郡

通典

唐武德四年平李子通置湖州天寶元年改吳興

郡乾元元年復為湖州

舊唐書

湖州吳興郡上土貢御服烏眼綾折皂布綿綢布

紵糯米黃糰

疑作

紫筍茶木瓜杭子乳柑蜜金沙泉

戶七萬三千三百六口四十七萬七千六百九十

六縣五 烏程望 長城望 安吉緊 德清上

武康上

新唐書

按談鑰吳興志唐歲貢御服折造布二百九十端一作紫筍茶一萬串又供尚食厨糙糯米一千三百八十三石有奇黃糙米一百九十八石木瓜糝四柑木瓜煎三柑單杭子一千三百五十顆重黃杭子一千三百顆又白蜜三石沙盆一百枚金沙泉一銀餅乳柑五百箇統記云龍德三年貢布三十端供御服折造布二百九十疋大曆六年始進木瓜糝大曆元年進木瓜煎單黃杭子二年進白蜜重黃杭子五年進黃糙米貞元十三年進糙糯米十四年進沙盆十五年進元和五年減米六十石本郡未嘗經兵火架閣典籍具在統記興國中攝長史左文質纂有所考據故所載年代數目可以補史之遺缺又按唐之歲貢如烏眼綾綢布紵唐初所貢數雖不詳統記載龍德三年貢布三十端可見其不多矣供御服折造布與木瓜杭子茶蜜大曆元年至六年始進唯是以兩稅錢和市供故不至甚病民糯米黃糙與砂盆貞元十三年至十五年始進至元和中和米已三損其一乳柑不載所進之年紫筍茶大曆五年始於顧渚置貢茶院院側有碧泉浦沙梁如金星則金沙泉亦大

石柱記卷一

三

曆後所進也唐自高宗太宗以仁慈保養天下物貢有常未嘗妄取下迨肅宗不聞更易大曆貞元之間洊經兵革貴官用事口腹之奉責貢於遠不憚煩費累增不已亦足見唐室盛衰之故矣宋初吳越歸命郡始修貢每歲唯貢乳柑五百顆編布二十疋茶角一兩茶一兩泉一兩銀一兩如統記所載視唐數已大歉又減茶泉故舊圖經唯載柑布二物後已免進柑故九域志唯載白紵二十疋漆器三十事紹興以後又獨貢白編布而已宋世相承以節儉為家法先王所謂物土之宜而致其利者代益以損可為萬世法

按夫戶口者租庸調所由起也唐之口四十七萬有奇今止二十九萬有奇唐之租庸調其數已不可考今銀則四十萬四千有奇米則三十萬九萬一千有奇苕霅野史曰有田則有租有家則有調有身則有庸古之制也今庸浮於調調過於租而租又居天下三分之一嗚呼蘇湖熟天下足和以滋味養以參苓毋勞手足衛我腹心德清陳志曰吳中之田賦役之重視他道較甚推厥弊源吳越以貢獻之故而賦斂者重南宋以和糴之困而經量者密賈似道之公田甚於經量張士誠之橫賦劇於吳越是故版籍相仍官田之多幾半於民而科則之繇莫革其弊真隱齋豪曰以一夫十畝之家論之一夫終歲勤動可耕十畝一畝米二石亦稱有年計為米二十石一夫食用可五石而贏蓋所存止十石矣實徵銀米畝可六斗而辦價米每斗七錢餘米止四石耳而妻孥之待哺衣縷之蓋形皆取資焉又有遞年因糧耗費因銀銷費不在此數以畝之所入較糧之所出則收穫雖極豐稔所餘無幾而民力竭矣戶口安得不消耗邪

按吳初置吳興郡領九縣烏程永安餘杭臨水陽羨故鄣安吉原鄉於潛晉析烏程置長城東遷為縣十一後割陽羨置義興郡為縣十宋以故鄣屬丹陽歷齊梁陳仍九縣隋平陳郡廢縣或并省各他屬仁壽二年以武康烏程長城三縣置湖州未幾復廢唐武德四年復置湖州止領烏程一縣七年始以武康長城來屬又并安吉原鄉入長城麟德中復置安吉天授中析武康置武源尋改臨溪又改德清乾寧三年陞湖州為忠國軍終唐之世凡五縣後梁開平中以武康屬杭州後周顯德中改為湖州宣德軍宋仍之太平興國四年復武康七年析烏程置歸安為縣六景祐元年改為湖州昭慶軍寶慶二年改湖州昭慶軍為安吉州縣仍為六元為湖州路陞長興為州餘五縣如故明為湖州府長興仍為縣陞安吉為州析安吉置

烏程縣

宋太平興國七年分烏程東南十五鄉置歸安縣因吳越錢氏初歸命故名與烏程對治俱附郭

舊緊今望鄉四十里二百東去蘇州二百一十里南去杭州一百八十九里西北去揚州六百四十七里西去宣州三百一十七里北去東都二千八百七十五里北去上都三千七百七十六里

石柱記卷一

四

按元和郡縣志州境西北至上都三千二百四十里通典云去西至東都二千二百四十里東北至蘇州二百一十里正南微北至宣州三百七十里東北至常州和陸路三百里東至杭州私路一百九十里杜氏通典吳興郡東至吳郡三百一十里南至餘杭郡一百九十里西至宣城郡三百八十七里北至吳郡二百一十里東南到餘杭郡鹽官縣界一百七十二里西南到宣城郡界二百六十一里西北到晉陵郡三百三十二里東北到吳郡二百二十二里再按太平寰宇記九域志談志俱與記互異

秦置烏程縣介於會稽鄣二郡之間

清類天文分野之書

秦時烏中程林以釀美酒縣因名

吳興雜錄

會稽郡烏程有歐陽亭

漢書注

吳郡烏程左傳襄公三年楚伐吳至於衡山杜預曰在縣南或云丹陽縣之橫山去鳩茲不遠子重所至也吳興記曰縣西北卞山有項羽祠興平二年太守許貢奏分縣為永安縣

續漢書注

吳興烏程今漢舊縣先屬吳

宋書

吳郡烏程舊置吳興郡平陳郡廢并東遷縣入焉

仁壽中置湖州大業初州廢有卞山

隋書

烏程望東一百二十三里官池元和中刺史范

傳正開東南三十五里有凌波塘寶曆中刺史崔

元亮開

即歸安之菱湖今成鎮市

北二里有蒲帆塘刺史楊漢公開

開而得蒲帆因名有卞山有太湖

新唐書

烏程縣治舊在子城內晉義熙六年始移今處唐

太和二年縣治生蓮花名蓮花閣

菰城文獻

按子城即今府治周一里古烏程縣治吳興郡舊城也統記云秦時為項羽故城唐武德四年趙郡王孝恭始於外築羅城周二十四里而以子城為刺史解署談志云舊傳郭璞欲移郡於東遷每立標輒為飛鳥銜去其女亦善地理啓璞毋徙因舊址損益之可以永無殘破之虞璞

石柱記卷一

五

從之其女今號遷城小孃子從璞廟食續圖經云郡置於吳而璞當晉惠懷之際避地東南事不相類乃於菰城云秦改縣為烏程至晉始移於苕霅之上烏程縣治即古郡治又自相牴牾切詳烏程治所當秦漢間已徙今之郡中故吳寶鼎置郡詔謂永安故鄣等水悉注於烏程若在菰城豈得云此夫既以縣為郡則必即縣治為郡治而縣治他徙矣璞隨元帝渡江仕為尚書郎損益古城之制相陰陽審向背庸有是理今羅城內苕水入西門餘不諸水入南門至江渚匯合為雲溪出北門趨太湖西南諸山屏列於前北有弁山盤踞於後子城居中受眾水之衝挹羣山之秀又四面多大溪廣澤故立郡以來永無兵革之患意非璞不能定不必引飛鳥以神其事也載按郡置於吳寶鼎即縣治為郡治距晉義熙計一百五十餘年縣治他徙何所舊志不詳又郡治為項羽故城晉宋齊梁間二千石至皆畏羽為屬祀之廳事而避居他室天監末蕭琛守郡始遷去之仍為太守廳事載在史冊今俗傳府治為梁沈約故宅稱吳興地主不知始自何人說鬼說夢也因記縣治附及之

帝顓頊冢

晉初衡山見顓頊冢有營丘圖衡山在州之東

吳興

續圖經

或疑顓頊都帝丘今濮州是無緣冢在此古今流

傳雖不可盡信然舜葬蒼梧禹葬會稽何必其都
邪今州之杼山相傳夏杼巡狩所至杼夏之七王
也禹葬會稽則杼之至此固無足怪庸俗之言未
可為全無據也

避暑錄話

予攷皇覽云顓頊冢在東都濮陽縣頓丘城門外
廣陽里中山海經云顓頊葬鮒嵎之陽魯公何不
深究遽信圖經之說

吳興掌故集

山海經鮒嵎之山漢水出焉帝顓頊葬於其陽九
嬪葬於其陰水經沔水注引之鮒嵎即蟠冢在今
陝西寧羗州北九十里與沔縣接界帝王世紀顓
頊葬濮陽頓丘今直隸開州是濮陽帝顓頊之虛

石柱記卷一

六

故曰帝丘見左傳謂陵在頓丘者是開州即濮陽
也今祀典亦在此地

三餘漫鈔

水經注南嶽响嶺山下舜廟南有祝融冢楚靈王
之世山崩毀其墳得營丘九頭圖非吳興之衡山
也且祝融火官亦非顓頊續圖經本以衡山傳會
魯公沿誤蓋亦未之考也

石虹日記

吳大帝陵

大帝陵在上元縣東北蔣山八里

太平寰宇記

按吳志孫權本傳權薨謚大皇帝葬蔣陵丹陽記云蔣陵因山為名六朝事迹云今蔣廟相對向西有曰孫陵岡是為蔣陵是大帝陵確有定所也權太子和以皇后失寵廢為庶人徙故鄣改封烏程侯遣之國後薨葬弁山子皓即位追尊為文皇帝墓曰明陵吳興記云西陵山孫皓改葬父和於此即弁山之別嶺也記作大帝蓋文字之譌耳文帝有廟在儀鳳橋南吳志寶鼎元年冬十月永安山賊施但聚眾數千出烏程

取明陵上鼓吹曲蓋比至建康衆有萬人丁固等逆戰但敗走尋滅因
詔立吳興郡以藩衛明陵命太守四時奉祠此吳興設郡所自昉也并
建廟郡中後人稱爲吳興地主廟西吳里語云吳文帝廟宋崇寧中訛
作沈約祠菰城文獻云嘉靖九年知縣戴嘉猷毀其像撤其祠二十四
年又復之今稱沈爲著姓約爲地主有司以時致祭於是天下競稱吳
興有地主沈云吳興沈氏竹墩馬要族最著竹墩祖元三史纂修官國
祥馬要祖元撫和處士德竝未嘗遠追武康德清諸沈或祖建威將軍
林子或祖侍中空慶之或祖織簾先生麟士雖同本述善侯亦不祖
休文譜牒具在班班可考也而謂沈爲著姓約爲地主義何取乎况吳
文帝以嫡嗣而遭廢黜小心翼翼恪守侯封毋論其肇造吳興即以揆
之忠孝大倫允稱無媿祀典亦可以不廢今訛作約祠有司以時致祭
其與祭法義又何取乎抑不特此也如郡中銅官趙監廟爲訛作武
安王廟昇山沈將軍祠爲訛作孃孃廟道場山東坡書院訛作觀音
堂竹墩朱奉議使_{長春書院訛作三官道院}忽又訛作徽國文公祠
愛山臺安吉趙太守_{民爲國死}幸列祀典忽借池州殉難趙通判之婦爲其
婦忽借本州殉難徐提刑之子爲其子訛作節義成雙男女雜沓寄食
叢祠當事不及聞吾輩不致辯嗚呼魂一變成虹血三年藏碧豈無靈
爽豈無怨恫森森爛爛神杳杳以何歸慘慘悽悽恨深深而莫訴嗚呼
是誰之過與

吳景帝陵

石枕記卷一

七

孫吳景帝葬定陵吳志不言所在南畿志云在太
平府城東凌家山魯公又記之均屬可疑近年海
寧祝仲基家一日有僧叩門請齋祝與之僧留不
去逾月告祝堂側有害珍寶無算導祝篝火掘之
有隧道數百步見石門金戶環兩狻猊坐門左右
中樹一碑隸書吳景帝陵門堅閉不能發期以次
日發之適祝以小過責僕僕潛赴縣告訐縣令遣
吏且至祝亟塞之而賄隸以事虛覆乃止予聞諸
家孝廉近修時祝尚存惜未及覲詢之也

竹垞說證

鈕皇后陵

魯公記吳景帝陵後即繼以鈕皇后陵勞鉞志著

姓謂吳景帝有鈕后然吳志孫休止有朱夫人竝
無鈕后惟陳武帝后章要兒本姓鈕永定元年正
位中宮太建二年崩謚宣太后祔葬萬安陵建康
實錄云萬安陵在縣東南古彭城驛側六朝事迹
云今縣東崇禮鄉地名陵里有曰天子陵其地有
石麒麟二里俗相傳即陳高祖墓然則鈕后之葬
亦在金陵矣陳書章皇后父景明追封廣德縣侯
母蘇拜安吉縣君安吉君卒與后父合葬吳興竊
疑魯公所記鈕皇后陵殆其父母墓爾頃聞之蒞
畦云十年前天寧寺西南居民馮氏堂後地忽陷
窺之得空穴中縣二棺土人層級而下陰風刮面

遂出以土覆之天寧寺為鈕氏捨宅建則此或即
后之父母墓未可知也

竹垞說證

按舊志青塘在迎禧門外吳景帝鈕皇后父葬卞山今百姓開之以通墓所自城入法華寺路也據此則吳景帝果有鈕皇后矣然云父葬卞山亦不當以景帝鈕后二陵並載也

吳丹陽太守蕪湖侯太史慈墓

太史慈字子義東萊黃人仕郡奏曹吏北海相孔
融以黃巾寇暴出屯都昌為賊管亥所圍慈從遼
東還赴融求兵出斫賊融不聽而圍日逼融欲告
急平原相劉備慈自請求行到平原說備備即遣
精兵三千人隨慈賊聞兵至解圍走揚州刺史劉
繇與慈同郡慈往見之會孫策至或勸繇可以慈

為大將軍繇曰我若用子義許子將不當笑我邪
但使慈偵視輕重獨與一騎卒遇策便可鬪正與
策對得其兜鍪繇奔豫章慈為策所執即解縛捉
其手曰寧識神亭時邪即署門下督還吳授兵拜
折衝中郎將繇亡於豫章士眾未有所附策命慈
往撫安焉還為建昌都尉治海昏卒吳志
太史慈葬于新吳今洪府奉新縣也邑人立廟敬
事乾道中封靈惠侯予在西掖當制其詞曰神早
赴孔融雅謂青州之烈士晚從孫策遂為吳國之
信臣立廟至今作民司命攬一同之言狀擇二美
以建侯庶幾江表之間尚憶神亭之事蓋為是也

容齋
二筆

太史慈墓在奉新縣南鄉十都地名感古江西通志

按慈墓郡志俱不書惟烏程徐
志傳會云在法華寺東石塢

吳大將軍朱治墓

朱治字君理故鄣人漢末為縣吏州辟從事隨孫
堅征伐累遷督軍校尉堅卒奉孫策平江東定會
稽領太守事策亡奉孫權為九真太守行扶義將
軍征討夷越佐定東南黃武元年封毘陵侯二年
徙封故鄣卒贈大將軍吳志

朱治墓在歸安縣南一十二里談志

吳蕩寇將軍程普墓

程普字德謀右北平土垠人初為州郡吏從孫堅征伐堅卒復隨孫策以功為吳郡都尉徙丹陽拜蕩寇中郎將領零陵太守策卒與張昭等共輔孫權周旋二郡平討不服領江夏太守遷蕩寇將軍

卒

吳志

程普墓在瑞昌縣安泰鄉桂林橋西南

江西通志

晉侍中羅含墓

羅含字君章耒陽人初為郡功曹轉州主簿桓温臨州補征西參軍徵為尚書郎累遷廷尉長沙相致仕還家階庭忽蘭菊叢生人以為德行之感年

七十七卒

晉書

石柱記卷一

十

羅含墓在耒陽縣南四十里

湖廣通志

按普含二墓顯然不在湖州與本傳相符魯公何據而書之

晉黃門侍郎潘尼墓

潘尼字正叔中牟人舉秀才為太常博士累官中書令永嘉中遷太常卿洛陽將沒攜家屬東出成皋即今鞏縣欲還鄉里道遇賊不得前病卒于塢壁

晉書

潘尼墓在縣東一十里

太平寰宇記

按本傳尼卒于塢壁何緣墓在此寰宇記想亦因石柱而載之

齊宣城太守丘靈鞠墓

丘靈鞠烏程人仕宋累官本郡中正兼中書郎入齊歷通直常侍東觀祭酒再遷長沙王車騎長史

大中大夫卒

齊書

丘靈鞠墓不詳所在

談志

梁中書侍郎丘遲墓

丘遲字希範靈鞠子仕齊歷殿中郎車騎錄事參

軍入梁遷中書郎歷司徒從事中郎卒官

梁書

丘遲墓在縣南一十六里

太平寰宇記

沈太虛侍郎虛中言昔湖州有人發古冢得碑乃

南朝丘遲其言遲乃左史丘明之後然則丘明竟

不姓左邪

能改齋漫錄

按諸道石刻錄云吳興丘氏大宗碑唐元和四年十月二十二日建虛中言所發之碑殆即是歟急就篇注左丘明本魯之左史繼守其職遂為姓韻會云丘姓出吳興河南二望風俗通曰魯左丘明之後藁簡贅筆亦云吳興丘墓一村之人皆姓丘有大碑列其墓上稱左史丘明之

石柱記卷一

十一

後談志志著姓歷敘丘氏世系何不主此說豈以諸書為不足據邪又輿地碑記目云吳興丘氏墓碑在烏程縣雲水鄉淋谷考劉宋晉陵太守丘傑烏程人年十四母卒止啖生菜歲餘得腹疾痛甚一日夢母曰死生是分別耳何爾徒苦啖生菜遇蝦蟇毒靈牀前有藥三丸可取服之傑驚起果得一甌藥服之下蟬子數升疾頓愈丘氏世保此甌傑居縣南七里鄰人胡氏築牆侵其界傑時未成童輒夜移籬退三尺胡氏慚亦退三尺遂成大路至今稱為丘路傑卒葬縣西一十八里疑即在雲水鄉也淋谷未詳

梁司空康絢縝墓

按絢縝不知何許人南史有康絢藍田人仕梁至司州刺史領安陸太守普通元年除衛尉卿未拜卒今云司空又贅一縝字恐未必是或者疑即康翼之後康宗之支族

陳五兵尚書康宗墓

汲郡蘭陵令奮節將軍康翼隨晉元帝渡江為吳

興郡丞因居烏程事見吳興記翼生豫章太守鎮

鎮生征虜司馬建武將軍欽信欽信生宋晉熙王

兵曹參軍黯黯生南臺 高高生齊驃騎大將軍

孟真孟真生梁散騎侍郎僧朗僧朗生陳給事中

五兵尚書宗先為山陰令子孫始居會稽顏魯公集

按二康墓俱不詳所在

石柱記箋釋卷一

潘大勳

馮演

全校

石柱記卷一

十一

石柱記卷二

藍畦 鄭元慶 箋釋

杏村 汪元文 審定

長城縣

朱梁避廟諱
改曰長興

吳興長城今晉太康三年分烏程

宋書

按輿地廣記輿地紀勝俱云長興安吉二縣梁陳屬陳留郡史無明文不知何所本

吳郡長城縣平陳廢仁壽二年復有雒山

隋書

按雒山在縣北五里梁陳故事云梁武帝時童謠鳥山出天子江表凡以鳥名山者悉鑿之獨此山不鑿陳高祖為皇帝追贈之

長城縣會昌四年十一月陞望

唐會要

長城望大業末沈法興置長州武德四年更置綏

州因古綏安縣名之又更置雒州并置原鄉縣七

石柱記卷二

一

年州廢省原鄉以長城來屬有西湖溉田三千頃
其後湮廢貞元十三年刺史于頔復之人賴其利

顧山有茶以供貢有銅

新唐書

按顧山即顧渚在縣西北四十二里元和郡縣志及輿地紀勝析而為二非也顧渚以吳王夫槩顧其渚可為都邑故名唐有貢焙院院側有清風樓絕壁峭立於大澗中流亂石飛走曰明月峽茶生其間尤為絕品張文規詩清風樓下草初出明月峽中茶始生讀書後志云陸羽與朱放輩論茶以顧渚為第一羽著茶經有云紫者上綠者次筍者上芹者次膳夫經云茶古不聞食之晉宋以降吳人採其葉煮是為茶粥至開元天寶之間稍稍有茶至德大曆遂多建中以後盛矣茗絲鹽鐵管權存焉元和郡縣志云顧渚每歲進奉茶役工三萬人累月方畢南部新書云顧渚貢焙歲造一萬八千四百斤建中二年袁高刺郡進三千六百串并詩開成三年以貢不如法停刺史裴充官舊編云貞元五年貢限清明到京謂之急程茶張文規詩牡丹花笑金鈿動傳奏吳興紫筍來自袁高以詩進規遂為貢茶輕省之始牟氏陵陽集云宋朝重建茗顧渚寂寥幾三百載元復修唐貢焙設湖常等處茶園提舉領之長興顧志引蕭洵顧渚採茶記有云國朝自丁酉年至洪武七年歲貢葉茶增至千斤又末茶變易價錢時值九十六萬奇八年革罷每歲止貢芽茶二斤永樂二年增至三十斤與會典開載相同今東南盛行解茶

嶰茶箋云環長興境產茶者曰羅嶰曰白巖曰烏瞻曰青峴曰篠浦曰顧渚不可指數獨羅嶰最勝環嶰境十里而遙為嶰者亦不可指數嶰而曰嶰兩山之介也羅氏居之在小秦王廟後所以稱廟後羅嶰也嶰茶彙鈔云羅嶰介於山中羅隱隱此故名羅嶰今唯洞山最佳縣西一百二十里曰九龍山山上有古石城又名石郭山輿地志云吳採章山之銅即此與安吉接界

吳王闔閭使其弟夫槩王居此築城狹而長因以

為名

元和郡縣志

初置縣富陂村晉咸康元年徙若溪北即今重光

觀地隋大業十一年徙於夫槩王廢城唐武德七

年始移今所

太平寰宇記

大雷山

大雷山在縣東北六十里高一百二十丈

太平寰宇記

小雷山洞庭之東山屬烏程大雷山洞庭之西山

石柱記卷二

二

屬長興

吳興舊編

兩山南北相對而不相見見即有風雷之異曰大

雷小雷

震澤編

大雷山小雷山澤山三山包山俱在太湖中舊屬

烏程今并屬蘇州吳縣

勞鉞府志

按大小雷分屬二縣魯公何以獨記大雷勞志又何以皆屬之烏程也太湖志大雷在洞庭山西北小雷在洞庭山西南續志兩山相去六十里在晉陵縣馬跡山西舊編之說誤也予問之前太湖守備牛龍光斗云長興夾浦之東三里即大雷山長興分界烏程大錢之北二十里即小雷山烏程分界俱在西洞庭之西勞志云并屬蘇州亦誤也晏氏類要輿地紀勝明一統志俱云歸安縣三山在太湖中大誤蓋歸安不能與太湖相接也

芳巖

按輿地紀勝引寰宇記云芳巖又名童山在宜興縣南六十里風土記云芳巖即此山也豈魯公時屬在長興邪

震澤

震澤吳南太湖名孔氏書傳

孔氏以太湖為震澤非是周官九州有澤藪有川有浸揚州澤藪為具區其浸為五湖既以具區為澤藪則震澤即具區也太湖乃五湖之總名耳凡言藪者皆人資以為利故曰藪以富得名而浸則但水之所鍾也今平望八尺一作測震澤之間水瀰漫而極淺與太湖相接而非太湖積潦暴至無以洩之則溢而害田所以謂之震蒲魚蓮芡之利人所資者甚廣亦或可隄而為田與太湖異所以謂之澤他州之澤無水暴至之患則為一名而已而具

石柱記卷二

三

區與三江通塞為利害故二名以別之此非吳越之人不知而先儒皆北人但據文為說宜其顯然失之地理而不悟也避暑錄話

按爾雅吳越之間有具區郭注今吳縣西南太湖即震澤亦非是禹貢長箋云職方具區即禹貢震澤胡氏禹貢錐指從之今烏程有震澤上下二鄉自上林軋村至南潯鎮皆是其地濱太湖蓋取諸此與葉氏之說相合魯公獨記長興而不及烏程何與

若溪

若溪在縣南五十步輿地志云夾溪悉生箭箬亦

名箬溪太平寰宇記

箬溪南岸曰上若北岸曰下若人取下若水釀酒

極美勝於雲陽俗稱下若酒程續蘇詩注

按臧衍長興志椒為中若之說至今有稱長興為三若者謬矣白居易詩勞將下若忘憂酒寄與江城愛酒翁錢凡詩上箬溪頭老圃家古若

箬溪源出合溪在画溪下流穿城東注明初耿炳
文築城開濠環城遂分流於城外繞過龍潭灣至
下箬寺會南溪諸水從新塘入太湖長興顧志

吳王夫槩廟
夫槩廟在縣東一百步太平寰宇記

夫槩廟二一在縣東一在縣西南七十里俗呼為
都監以其曾監築城故也勞府志

按語林狄仁傑為江南安撫使以周赧王項羽吳夫槩等神廟七百餘
所有害於民悉除之魯公在梁公後仍記此廟豈未嘗毀乎圖經作吳
王棠谿氏廟即夫槩也
類要作夫差王廟非是

石柱記卷二

陳景帝陵

齊太常卿道巨生皇考文纘文纘生霸先永定元
年霸先即皇帝位追尊皇考曰景皇帝廟號太祖
皇妣董太夫人曰安皇后墓曰瑞陵陳書

瑞陵在縣西北五里談志

陳錢皇后陵

錢氏長城人父仲方高祖微時先娶之早卒及即
位追尊為昭皇后墓曰嘉陵陳書

嘉陵在縣北五里談志

陳昭烈王陵

高祖兄道談梁太平二年詔贈散騎常侍使持節
平北將軍南兖州刺史長城縣公加義興郡公謚
曰昭烈高祖即位追贈驃騎大將軍太尉封始興
郡王

陳書

道談仕梁為東宮值閣將軍侯景亂領弩手二千
援臺城中流矢卒葬縣西北五里文帝即位尊為

明陵

談志

謝安墓

謝安字安石陽夏人簡文帝時桓温請為司馬弟
萬病卒安求歸尋除吳興太守在官無當時譽而
去後為人所思嘗開城西官塘民獲其利號曰謝

石柱記卷二

五

公塘召拜侍中進太保卒贈太傅謚文靖

晉書

按太平寰宇記云謝公塘在烏程縣西四里唐大曆中刺史裴清於州
西起謝塘館復齋碑目云謝公塘碑唐刺史裴清撰僧道說書大曆七
年十月十一日龍興寺沙門皎然建魯公題碑陰曰太保謝公東晉咸
和中以吳興山水清遠求典此郡郡西至長城縣通水陸今尚稱謝公
塘及遷去郡人用懷思刻石紀功焉歷代至皇唐天寶末羣盜起公之
碑誌失於所在春末蕪沒深為愴然借舊史遺文敬刊息石公之雅量
蓋嗟歎之不足此碑陰不知魯公何年所書年譜不載集古錄云射堂
記唐顏真卿撰并書碑石缺壞不可考以大曆十二年立年譜亦不載
射堂者吾湖古教場廳事也六一題跋云魯公在湖州所書刻於石者
予家集錄多得之今僕射相公筆法精妙為子稱顏氏書射堂記最佳
遂以此本遺予以予家素所藏諸書較之唯張敬因碑與斯記為尤精
勁陵陽集云魯公乞米鹿脯二帖舊刻在忠烈廟廡苔記云魯公蠶頭
鼠尾碑在明月峽宋時州縣數來摹拓土人憚費擊碎之又有斷碑二
在墨妙亭烏程有浪迹先生玄真子碑皆魯公書年譜俱不載再按談
志放生池在駱駝橋東距羅城有閭門遺跡池周數十畝唐乾元三年
春三月詔洋州之興道泉山南劔南黔中荆南嶺南江西浙江諸道迄
於昇州之江寧秦淮太平橋臨江帶郭上下五里各置放生池凡八十
一所此其一也魯公立碑池上又以所賜敕書批荅中諸事志之碑陰
輿地紀勝云宋嘉祐六年州人建魯公祠於池上知州事張田移公所
書千祿字碑放生池碑項王碑射堂碑列於兩廡繫年錄云紹興三年

三月庚申名湖州唐太子太師顏真卿廟曰忠烈用守臣汪藻請也
在郡勞志載駱駝橋東有能仁院放生池並廢今東街尚有承天寺巷
疑即能仁院相近有池俗名秤錘潭却有閻門遺跡即放生池也此皆郡人所罕知者故附見於此

謝安墓在縣南六十五里初葬建康梅山陳始興王叔陵發其冢裔孫夷吾為長城令徙於縣南三

鷓岡 吳興雜錄

按宋康定中知州事胡宿奏乞於冢旁申禁樵採給復五家以備洒掃
守護之役敕州縣官吏歲時祠祭以明聖朝紀元功褒有德之意從之
長興顧志云三鷓岡在縣治西南四十里與雜錄不合

殷仲文墓

殷仲文陳郡人吳興太守殷康子會稽王道子引為驃騎參軍後為元顯征虜長史會桓玄與朝廷有隙玄之姊仲文妻也疑而間之左遷新安太守

石柱記卷二

六

玄平京師便棄郡投玄為諮議參軍玄將為亂使總領詔命以為侍中領左衛將軍玄九錫仲文之辭也初玄篡位入宮其牀忽陷羣下失色仲文曰將由聖德深厚地不能載玄大悅尋敗仲文隨玄西走因奉二后投義軍為鎮軍長史轉尚書帝初反正抗表自解遷東陽太守義熙三年伏誅 晉書

殷仲文墓在縣東三十二里 太平寰宇記

按仲文人品如此其墓亦可以不記况江南通志載其墓在太平府城南一十五里

陳武帝故宅

高祖武皇帝諱霸先字興國長城下若里人仕梁累官太傅進相國總百揆加封十郡為陳王永定

元年冬十月受梁敬帝禪即皇帝位三年六月崩
年五十七謚武皇帝廟號高祖陳書

廣惠教寺在縣治東九里相傳為陳武帝故宅談志

陳武帝故宅或云在報德寺或云在廣惠寺未知

孰是或者廣惠乃其所生之地而報德則其所居

之處也長興顧志

陳文帝故宅

世祖文皇帝諱蒨字子華昭烈王長子高祖崩遺

詔徵繼大統七年崩年四十五謚文皇帝廟號世

祖陳書

長城宮在縣西二里陳文帝所居天嘉二年置于

石柱記卷二

七

大寧寺後談志

吳均故宅

吳均字叔庠故鄣人好學工詩文天監初柳惲守

吳興舉補主簿後以薦召入賦詩待詔著作累遷

奉朝請普通元年卒梁書

吳均居青山在吳興之西柳太守惲召補主簿始

入東境乃作入東記以辨山川故實吳興掌故集

按太平寰宇記青山在長興縣南六十里安吉江志州東北三十五里曰青山一名均山以吳均名又云吳均故宅在順安鄉青山長興安吉

二縣接界均本傳故鄣人其宅當在安吉

陳氏五主屏風

按陳氏五主高祖霸先世祖蒨廢帝伯宗高宗頊後主叔寶釋名屏風以屏障風也屏在後所依倚也禮記明堂位天子負斧扆南面而立三

禮圖展縱廣八尺畫斧
文今之屏風則遺像也

陳高祖竹帳

按唐書唐高祖時吳王杜伏威獻竹帳上
以勞人不受則竹帳匪獨陳高祖有之

國朝高僧南山律主道宣

道宣姓錢氏長城人唐武德中住終南山與處士
孫思邈結林下之交每一往來議論終夕西明寺
初就詔充上座撰法門文記廣弘明集續高僧傳
卒謚澄照 高僧傳

安吉縣

明成化二十三年十一月甲辰開設孝豐縣割安吉縣之九鄉及長興
縣之三鄉隸之見實錄今志作弘治二年者誤也又正德元年十一月
乙丑改安吉縣為安吉州見
實錄今志作二年者誤也

丹陽郡故鄣菴曰候望 漢書注

石柱記卷二

八

丹陽郡故鄣秦鄣郡所治吳興記曰中平二年分
縣南置安吉縣光和末張角亂此鄉守險助國漢
嘉之故立縣中平二年又分立原鄉縣 續漢書注

安吉縣會昌四年十一月陞緊 唐會要

安吉緊義寧二年沈法興置武德四年賊平因之
以縣隸桃州七年省入長城麟德元年復置北三
十里有邸閣池北一十七里有石鼓堰引天目山
水溉田百頃皆聖曆初縣令鉗耳知命置有銅有

錫 新唐書

按桃州以山得名今孝豐縣西南五十里有桃花山出桃花石皎然詩
桃州採得桃花石史記吳王濞傳吳有豫章郡銅山韋注今故鄣此有
豫字誤也當云章郡章鄣古字通今州東三十里有銅山括地志云吳
採鄣山之銅即此輿地紀勝云安吉有銅祠古出銅處又州東南二十

二里有白楊山括地志云上有兩穴古採錫處

安吉舊治在天目鄉今孝豐縣址是也唐開元中

縣令孔志道移治於玉磬山東南無城洪武丙申

總管張德始城之元帥費愚監其事

安吉江志

天目山

今屬孝豐縣在縣西南六十五里

勾餘山東五百里曰浮玉之山北望具區東望諸

毗有獸焉其狀如虎而牛尾其音如吠犬其名曰

彘是食人苔水出於其陰北流注於具區其中多

鯿魚

山海經

按爾雅鯿鱧刀郭注今之鯿魚也異魚圖贊云鯿魚蝴蝶所化列夔長鬚今太湖有之大者名刀鯿小者亦可作鮓張文規詩食有吳興鮓蔡寬夫詩話云吳中作鮓多就溪池中荷葉包為之味比餅缶中者尤佳白居易詩就荷葉上包魚鮓當石渠中浸酒尊

石柱記卷二

九

近世道士唐子霞謂圖經天目山一名浮玉山連

亘四州

杭宣徽湖

周回二千里上有養生之藥著草元華

皆名著仙經

咸淳臨安志

按天目山山之最天者也山海經多記天下名山大川是以及之時但名浮玉不名天目也太平寰宇記記天目而不言浮玉各志遂於天目山後另列一浮玉山皆非也當依唐子霞為是

天目山以其上有兩湖似左右目名天目也

趙次公蘇詩注

天目山左高於地七千五百丈右高於地七千丈

縱廣三千里

雜道書

天目有二峰東峰從臨安入西峰從孝豐入有十

二龍潭六潭屬孝豐六潭屬於潛

天目山志

天目之頂有龍居焉中常出水四方而下南派由

睦西派由歙皆入浙江東派由餘杭北派由安吉

皆會太湖入吳江徑山山門事狀

天目山神形如白鹿每歲五月與震澤龍會多暴

風雨六研齋筆記

按山海經南次二經諸山神狀皆龍身而鳥首其祠毛用一壁瘞瘡用
徐李太僕不知何據云形如白鹿也今天目山之神廟在孝豐縣金石
鄉舊制歲以六月六日有
司致祭後更春秋二仲月

崑山

玉磬山高五百尺在縣東北十五里太平寰宇記

梁僧曇諦吳興人居故鄣崑山每夜聞有聲尋其

發聲之所得玉磬因以為名高僧傳

橫溪

石柱記卷二

按舊志無橫溪孝豐新志云橫溪在縣西北當即茗水太平寰宇記所
謂茗水在安吉縣治西南七十五里者此也談志云茗溪之源有二一
發自天目山之陰廣茗山東過金石鄉又東過靈奕鄉又東過安吉縣
南之郡渡又東南過章渡又折而北至丘渡與獨松水合一發自獨松
嶺西合眾山之水東過浮石山南又折而西北至丘渡與廣茗水合二
水合而東過倪渡又折而西又折而東北過梅溪鎮北為龍溪又北過
吳山又北過彭匯又東過和平入凡常湖箬溪四安塘諸水北來注之
匯為西溪北過釣魚灣又北過迎禧門又折而東至臨湖門與雲溪水
合又自西溪東入清源門至於雲溪又自清源門折而南又折而東出
愈思橋與峴山漾南來水合又自西溪北過迎禧門又東北下橫涇港
經小梅湖
口入太湖

梅溪

梅溪一名東海堰統記

梅溪在縣東北三十里溪上多梅故名或曰昔年

嘗有紫梅花盛開又號紫梅溪談志

梅溪以梅得名而烏梅特為名產他方所製取自

殘落安吉特摘完好者為之其得名非徒然也吳興

掌故集

蛟龍池

天目山東南有瀑布下注數畝深沼名曰蛟龍池

水經注

按說文云蛟龍屬也無角曰蛟池魚滿三千六百蛟來為之長能率魚飛置笥水中則蛟去埤雅云龍八十一鱗具九九之數九陽也廣雅云有鱗曰蛟龍郭璞云蛟似蛇四脚細頸故杜氏編珠作地龍池地俗蛇字

翔鳳林

天目山上有霜木皆是數百年樹謂之翔鳳林水經注

翔鳳林在天目之東北峰高峻類天柱廬阜咸淳臨安志

石柱記卷二

十一

按龍池鳳林俱在東峰恐非湖境

裴子野故宅

裴子野字幾原聞喜人初仕齊入梁歷著作郎掌

國史起居注尋除通直正員外又勅掌中書詔誥

歷鴻臚卿領步兵校尉卒贈散騎常侍謚貞子梁書

裴子野寓居湖州之故鄣著諸侯略宅在縣西南

三十六里永昌鄉輿地紀勝

裴子野曾祖松之令故鄣有善政邑人愛之子野

因寓居焉談志

周弘讓故宅

周弘讓安城人天嘉初以白衣領太常卿光祿大

夫加金章紫綬

陳書

周弘讓兄弘正仕梁為安吉令弘讓結宇山中耽玩文史其故宅在縣南三十六里

談志

姚萇雉尾扇

姚萇赤亭羌冑苻堅以為龍驤將軍後自稱秦王太元十年弒堅據長安僭稱帝一夕夢堅率鬼兵刺之出血數斗死

晉書

商高宗有雉雒之徽章服多用翟故有雉尾扇

古今注

施世瑛金鐘

施世瑛字玉華安吉人家世農不親襪襍喜騎射隋末多盜糾合少年膂力保禦鄉境唐興以眾歸

石柱記卷二

十三

附積功拜洮州刺史賜金鐘一口錦五段敕書褒

美

舊唐書

屏風竹帳雉尾扇金鐘皆先代遺物流傳於世者

然魯公何至刻而記之

吳興掌故集

石柱記箋釋卷二

許 雍校

石柱記卷三

蒞畦 鄭元慶 箋釋
磊亭 吳鍾泰 審定

山川

卞山 法華寺 金井 玉澗 乳竇 石膏 温

泉 項王走馬埒 項王飲馬池 項王繫馬石

卞山峻極非清秋爽月不見其頂望氣者云常有

黃氣紫雲居者

吳興雜錄

卞山有石匱每欲開則風雨晦冥

輿地志

卞山郡國志作卞和採玉處非也周處風土記云

卞山當作冠弁之弁徐陵孝義寺碑云高弁蒼蒼

石柱記卷三

遙聞天語

太平寰宇記

卞和採玉以在荆山當陽縣者為的餘非是是時

吳楚參隔和得玉不獻吳君而僕僕楚庭必無是

理風土記說是

石虹日記

按卞山在烏程縣西北一十八里高六千丈為吳興主山雖四散各表為名其實皆卞也諸史俱作卞圖經亦云卞山下姓居之演繹露為山形如弁亦與卞通勞府志云古卞弁通用不必強為穿鑿周氏之言何足據也其山西北屬長興縣

法華山太平寰宇記謂之石斗山王羲之嘗遊處

焉梁尼道蹟號總持得法於達磨居卞山晝夜誦

法華經二十年不下山後歸寂即葬其處大同元

年塔內忽生青蓮花道俗異之州郡錄實表奏敕

置法華寺

談志

按法華山即今白雀夾道松陰坡陁直上皎然詩路入松聲遠更奇山光水色共參差蘇東坡題曰青蓮道場

金井在卞山東麓梁貞明初有黃龍見易名黃龍

洞洞口黃山谷題額刻於石

談志

按制每歲五月二十日有司致祭湖人稱是日為分龍日農政全書云五月二十日大分龍無雨而有雷謂之鎖雷門覓見則旱

石林在卞山之陽葉少蘊之所居也其鄰有朱氏

怡雲菴涵空橋橋下為玉澗故少蘊以玉澗名其

書

吳興園林記

按石林即玲瓏山唐宋人題名最多一巖上題云前湖州刺史杜牧大中五年八月八日來有歸雲洞宋道士張有篆於石宣和石譜云湖石出卞山者最為奇秀布滿山間嵌空礪塊色類靈璧而青潤可愛癸辛雜識云良嶽與大役連轡輦致不遺餘力其大峰特秀者不特封侯或賜金帶且各圖為譜其工人多出於吳興謂之山匠四方之為山者皆於此取之盧氏雜說云唐有達僚差軍將於湖州買石軍將申狀云前狀石蛙蚱不堪買此言甚鮮可作吳興佳話

石柱記卷三

二

乳竇

按舊志不載乳竇明一統志云烏程卞山出石鍾乳疑即乳竇中所滴也先給諫鳴岳集云卞山之陽有黑龍洞郡志不載其洞庫前軒後如夏屋之半廣可肆十筵其石都垂垂下懸如綴上產石鍾乳潤白如蜃灰

石膏文理細密曰細理石性寒如水曰寒水石有

軟硬二種自陶弘景蘇恭大明雷敷蘇頌閻忠孝

皆以硬者為石膏軟者為寒水石至朱震亨始斷

然以軟者為石膏而後人遵用有驗今人以收豆

腐乃昔人所不知

本草綱目

按別錄石鍾乳生少室山谷及泰山弘景曰第一出始興而江陵及東境名山石洞皆有之恭曰第一始興其次廣連漕湖柳等州今陝州青溪房州二洞出者亞於始興頌曰今道州江陰縣及連英韶階峽州山中皆有之又別錄石膏生齊山山谷及齊盧山魯蒙山弘景曰二郡之山即青州徐州也今出錢唐縣數曰石膏出剡州頌曰今汾孟號耀州慶元亦有之俱不及卞山豈諸人未見魯公所記故不入錄邪

温泉

按舊志不載温泉卞山志法華寺有五靈泉資福寺有露泉碧巖有珠簾泉石林有品泉蒼山有鳳味泉白鶴寺有秦龍泉二致泉有人題白鶴山十二景詩其八詠二致泉云九夏寒凝電三冬燠若湯不隨人冷熱豈逐世炎涼斯即所稱温泉歟丹鉛總錄云温泉所在必有白礬丹砂硫黃三物為之根乃蒸為暖流

卞山有項王走馬埒飲馬池繫馬木石間又有項

王馬跡山墟名

按異苑云卞山舊名土山有項羽廟號卞山王故名卞山卞山志云山之西南夾作橋有廟焉廟中石像冠通天冠并祀虞姬及父老而鄉人以為關帝云郡中亦有廟在奉勝門內俗呼為霸王門者謂此廟中有碑魯公作碑陰述云西楚霸王當秦之末與叔梁避仇吳中蓋今之湖州也雖滅秦而宰制天下其魂魄猶樂茲邦至今廟食不絕其神靈事迹具竟陵子陸羽所載圖經大曆八年真卿蒙刺是州十二載茲臣伏法恩命追真卿上都克期首路竟陵是諗予以故碑顛趾嘗因仍草莽已而復之真卿乃命再加崇樹以紀之時則仲夏方生明之日勞志又載有廟碑宋雍熙四年九月一日宣奉郎守太子中允湖州通判張懌撰今廟與碑並不存

石柱記卷三

三

衡山 帝顓頊冢 春秋鳩茲城

壽夢十六年楚恭王怨吳為巫臣伐之也乃舉兵伐吳至衡山而還注云見左傳襄公三年楚克鳩

茲至于衡山吳越春秋

衡山一名橫山在烏程縣南一十八里兩山夾峙

中流北駛為郡城南形勝之地談志

帝顓頊冢見前

左傳襄公三年春楚子重伐吳為簡之師克鳩茲至于衡山杜注鳩茲吳也在丹陽蕪湖縣東衡山在吳興烏程縣南太平府志蕪湖縣東三十里故蕪湖城即春秋鳩茲城也蓋鳩茲之克始入吳境

而至于衡山則深入腹地矣二地不相附近楚以舟師伐吳其所由者中江也漢地理志云中江出蕪湖縣西南至陽羨縣入海今高淳之胥溪溧陽之永陽江宜興之荆溪皆中江也楚師蓋由荆溪入太湖抵衡山而還耳哀公十五年楚子西子期伐吳及桐汭杜注宣城廣德縣西南有桐水出白石山西北入丹陽湖此亦是中江之路楚舟師伐吳輒由蕪湖入自西而東而南至於衡山極矣若菰城則更在衡山之南楚師決不由東南入也且凡言至於者皆自此至彼中間相去頗遠今菰城在縣南十八里去衡山無幾何得稱至於此理亦

石柱記卷三

四

甚明謂鳩茲在烏程一誤以菰城為鳩茲再誤

漫鈔

按郡國志烏程縣南十八里有下菰城吳時鄭姬善相人者居此又云春申君立菰城縣在郡南二十五里秦改為烏程至今有城因山宋為牧馬所則是一地而指為兩處也海錄亦云烏程縣乃古菰城楚以封春申君今俗呼下菰城而舊經謂之五菰城諸書皆不足據也按史記楚封歇為春申君賜淮北十二縣後十二年復獻淮北地請封於江東因城故吳墟以為都邑今始蘇城內西北隅四縱五橫之迹皆是則其封邑安得在吳興邪吾意下菰城者或春申君伐吳時屯駐之處

峴山 顯亭 故別駕李適之石酒罇 五花亭

峴山在烏程縣南五里本名顯山晉太守殷康於山上起顯亭以避唐諱改之

寰宇通志

按唐中宗諱顯魯公既書峴山何以又書顯亭也問之竹垞先生先生示予唐大詔令顯慶五年正月詔曰孔宣設教正名為首戴聖貽範嫌名不諱比見鈔寫古典至於朕名或缺其點畫或隨便改換恐六籍雅言會意多爽九流通義指事多違誠非立書之本意也自今已後繕寫

舊典文字竝宜使成不須隨義改易則知魯公之書顯亭者遵顯慶之詔爾

唐開元中李適之為湖州別駕峴山有石觴員可貯酒五斗適之每挈所親登山酣飲望帝鄉時時以醉土民呼為李相石罇顏真卿及門生弟姪多攜壺榘檝以遊作李相石罇聯句詩敘云因積溜深石嵌為罇形公注酒其中結宇環飲之處類要

按唐書適之恒山監王孫天寶元年進左相後為李林甫所構遭貶尋自殺飲中八仙歌所謂左相日興費萬錢飲如長鯨吸百川銜杯樂聖稱避賢者也

石罇聯句 李公登飲處因石為窪罇顏真卿人事
歲年改峴山今古存劉全白
蓊蕪掩前迹苔蘚餘舊
痕裴循
叔子尚遺德山公此迴軒張薦維舟陪高

石柱記卷三

五

興感昔情彌敦吳筠藹藹賢哲事依依離會言強
蒙嶇欽橫道周迢遞連山根范縉餘烈一作暖林野

泉芳揖蘭蓀王純德輝映巖足勝賞延高原魏理
遠水匹明練因晴見吳門王修甫陪遊追盛美揆德

欣討論顏峴器有成形用工資造化元左輔元流霞
方泔淡別鶴遽翩翩劉茂舊規傾亦賞新興麗初

暎顏渾醉後接羅倒歸時騶騎喧楊德元遲回向遺
迹離別益傷魂韋介覽事古興屬送人歸思繁釋

晝懷賢久徂謝贈遠空攀援崔弘公案鑿懿躅高
名播乾坤文仲宣松深引閑步葛弱供險捫陸羽花

氣酒中馥雲華衣上屯丘子中一作森沉列湖渚牢落

望郊園陸士修白日半巖岫清風滿丘樊裴幼清旌麾
間翠幄簫鼓來朱轡柳淡閑路躡雲影清心澄水
源釋塵外萍連浦中嶼竹遶山下村顏顛景落全溪
暗烟凝半嶺昏顏頤去日往如復換年涼代温顏
須登臨繼風騷義激舊府恩李萼

美合集

按掌故集云魯公聯句者二十有九人公之二子亦與焉內劉全白先以評事遊湖後貞元為守吳筠入嵩山為道士來此李萼先任殿中侍御史公辟為防禦副使左輔元先因公刺撫州增廣韻海五百卷至是來湖三教俱集且不遺後進公之襟度如是真可謂之雅集惜未有泐之石者
或云山上有石蹲鵞石碑
東坡詩魯公賓客皆詩酒誰是神仙張志和趙次公注云玄真子姓張名志和顏魯公與之友善魯公刺湖州與門客會飲乃唱和為漁父詞其首唱即志和之詞曰西塞山前白鷺飛桃花流水鱖魚肥青箬笠綠蓑衣斜風細雨不須歸魯公與陸鴻漸徐士衡李成矩共唱和二十五首遞相誇尚名画錄云志和漁釣吳興顏魯公典郡知其高節以漁歌五首贈之張乃隨句賦象人物舟船烟波風月鳥獸皆依其文寫之曲盡其妙西塞山在縣西一十八里經鉏堂雜志云下孤菁山之間一帶遠山為西塞勞府志因之云在縣西南二十五里非

石柱記卷三

六

也趙次公謂西塞為湖州磁湖鎮道士磯尤謬蓋磁湖鎮在武昌野客叢書云天下有兩西塞一在雲川一在武昌按唐書張志和願浮家泛宅往來苕雲間又志和詞中有雲溪灣裏釣魚翁之句明此知志和之西塞正在雲川而在武昌乃曹武成王用師之城洪內翰作西塞漁社圖亦嘗辨此而劉氏漫錄乃謂志和西塞在武昌所見誤矣

唐天寶中刺史韋景先起五花亭

太平寰宇記

唐選士用五花判事為韋氏所建白韋璋韋南金

韋景先三世為湖守因以名亭

談志

按清異錄云峴山有洛如花似竹而叢生郡有文人則出山南曰蘇灣蘇子瞻常游之蓴菜生焉菰城八譜云蘇灣之蓴勝於蕭山湘湖每誦鶴生嫩頂浮新紫龍脫香額帶舊涎便令季鷹思切山上有三賢祠明正德己卯督學使者劉瑞建祀顏魯公蘇東坡王梅溪皆嘗守湖州而有功德於民者明季增入監司王鳳洲稱四賢今為歷代名守祠矣峴山志云子友程學顏嘗聞諸唐一菴先生曰峴山舊有高風堂祀隱逸諸公披裘翁吳慶之沈沈警沈顛沈道虔沈徽賈收胡仔林靜章得一沈貞夏義甫王升吳琬凡十五人後增衛富益一人其址即逸老堂是又有嘉客祠祀流寓諸公錢林吳美沈戎丘騰裴子野張志和陸羽吳筠陸龜蒙姜夔何彥猷程大昌蔡洸方淑劉光祖程公許高斯得牟

子才游侶吳潛貢師泰吳玠共二十二人後增張羽徐賁二人其址即
滴翠軒是第未知建自何年毀自何歲予考吳慶之濮陽人衛富益崇
德人應入嘉客祠丘騰烏程人應入高風堂吳潛德清人貢師泰吳玠
未嘗寓湖州不應入嘉客祠再欲於高風堂增吳馮錢選周密趙金龐
太元吳夢暘六人於嘉客祠增溫祥卿劉麟孫一元徐獻忠吳炯李樂
黃周星楊爾銘夏古丹九人一并請之當事仍列祀典逸老堂嘉靖二
十六年湖州通判楚東湯世賢為劉南坦蔣石菴諸老建春秋社會之
所滴翠軒今為僧寮堂下數十武即窪罇亭今圯又前為浮碧亭下瞰
峴山漾漾納泉山之水清而碧每風生浪湧其色可觀故又名碧浪湖
中央巨石如積不以水盈縮為高卑曰小浮玉山以別孝豐之大浮玉
也家有浮圖竹垞先生語予曰揚子金山名浮玉安知小浮玉之名不
以是山比之乎其說頗可聽今湖中泥沙淤塞漸成洲渚遇旱燠舟楫
罕通此亦吳興之一患
也司民社者曷留意焉

杼山 妙喜寺 黃浦橋 避它城 何楷釣臺

杼山在烏程縣西南三十里山墟名曰昔夏后杼
巡狩之所舊名東張多勝景游者忘歸因號稽留

山 太平寰宇記

石柱記卷三

七

杼山之陽有妙喜寺梁武帝之所置也寺前二十
步跨澗有黃浦橋其水自杼山西南五里黃磔山
出故號黃浦寺東偏有招隱院其前堂西廈謂之
溫閣從草堂東南屈曲有懸巖徑行百步至吳興
太守何楷釣臺西北五十步至避它城按說文云
它蛇也上古患它而相問得無它乎蓋往古之人
築城以避它也竟陵陸羽杼山記所載如此

顏魯公集

按黃浦發源黃磔山吳興記傅會春申君及後漢司隸校尉黃向皆非也福建建寧府浦城縣昔為吳興縣亦有黃磔山歐餘漫錄云分吳丹陽為吳興郡者吳寶鼎元年也置吳興縣於建安郡者吳永安三年也郡縣名雖同而地之相去遠矣宋江淹為吳興令嘗自敘云吳興地在東南嶠外闕越之舊境其游黃磔山詩亦云闕雲連越邊何顏魯公杼山碑撫淹賦詩事乎太平寰宇記晏氏類要輿地紀勝諸書俱仍其謬曰黃磔山梁光祿卿江淹賦詩之所再按晉陸邁宋賀道力梁王琰俱吳興令宋檀道濟沈懷明唐沈佺期封吳興侯與子男其明冠以建安

郡者封懷明詔及淹本傳也栗祁府志混入江淹王琰在守令表中後魏改襄州為湖州樂遜冀雋廣固皇甫道李壽俱湖州戶曹參軍西吳里語亦混載之長興舊名長城武康舊名永安唐改武康為安州又改為武州考諸史書三山縣舊名長城百泉縣後魏置長城郡黃石縣西魏改為長城如北齊信都芳後周令狐整封長城縣子是也陽安縣西魏置武康郡如崔士謙令狐熙封武康郡公是也洋州趙宋置武康軍如福王與芮及韓琦姚麟俱武康軍節度使畢再遇武康軍承宣使是也泔水舊置永安郡黃岡亦名永安普安郡梁改為安州武陵郡梁改為武州又開德有德清軍保安有德清皆括蒼有雲川荆州有烏程鄉輿地之名相混如此汲古者不可不察也

妙喜寺碑云大曆七年蒙刺是邦觀察判官御史
袁君高巡部會於此山遂立亭於東南陸處士羽
以癸丑歲冬十一月癸卯二十一日癸亥建名之
曰三癸又云自典校時著韻海鏡源未遑刊削壬
子歲叨刺於湖公務之暇與金陵沙門法海前殿
中侍御史李萼陸羽國子助教州人褚沖評事湯

衡清河泉太祝柳察長城丞潘述縣尉裴循常熟
主簿蕭存嘉興尉陸士修後進楊遂初崔弘楊德
元胡仲南陽湯涉顏祭韋介左興宗顏策以季夏
於州學及放生池討論至冬徙於茲山來年春遂
終其事考之乞御書題額恩敕批荅碑陰記云七
年秋九月歸自東京起家除湖州刺史來年春正
月至任放生池碑亦書云七年秋九月己亥蒙除
不應壬子之九月至京癸丑之正月至任而壬子
之季夏己與羣士討論於州學冬復徙於杼山癸
丑之春遂成書而終事碑銘云三癸嶙峋又云紛
吾著書羣彥惠臻言羣彥著書於三癸之亭也夫

既大曆七年蒙刺是邦癸丑十月方有此亭安得
壬子之冬羣彥已集是必寺碑傳寫於金石剥落
之餘誤以癸丑為壬子當終事於甲寅之春也顏魯

公年譜

顏魯公於杼山起桂棚三癸亭及謝臨川寫真堂

類要

按謝靈運官臨川內史嘗遊寓吳興相傳謝村福田寺其故宅也僧皎然自稱靈運十世孫寫真堂想魯公為皎然起耳

昇山 吳均入東記 晉吳興太守王羲之烏亭

昇山一名歐餘山又名歐亭山昔越王無疆之子
蹄封於歐餘山之陽為歐陽亭侯子孫因以為氏

明一統志

石柱記卷三

九

按漢書注云烏程有歐陽亭即此

昇山在烏程縣東二十里入東記云晉王羲之為

太守嘗遊踐因昇此山顧謂賓客曰百年之後誰

知王逸少與諸卿遊此乎因有昇山之號太平寰宇記

按入東記吳均所著昇山云云出其記中魯公何以割裂書之晉書羲之本傳竝未有吳興太守之文吳興名郡六朝諸公紛紛奏乞以為韻事凡典郡者史必大書特書何獨於逸少而佚之吾終不敢信也

烏亭在昇山上王羲之造以烏巾氏所居也寰宇通志

按談志昇山一名烏山舊編云古烏巾氏所居也今縣東八里有烏山一名別鮮山爾雅小山別大山鮮疏云不相連屬者予嘗讀書烏山登其巔望西余山下有小山似相屬及至其處又相去里許則所謂別鮮山者疑即西余而非烏山也至問烏山何以名土人曰古烏巾氏所居山上有烏亭舊址即今烏巾菴山下有烏板橋舊有烏氏聚族於此則梁吳均同柳吳興烏亭集送柳舍人詩蓋即此山而非昇山也二山離郭不遠極易考見乃蒙混至此又按晉書羲之為會稽內史晉祚中替重以王敦蘇峻鼓亂羲之自負經濟知時事不可為遂稱病去郡與東

土人士盡山水之遊則義之雖未嘗守郡然來遊踐此山亦未可知義之子獻之嘗為吳興此亭或獻之造當時人或誤書之

金蓋山 何氏書堂 張邵丘道祚禪幽寺

晉何楷居金蓋山修儒業後為吳興太守改為何

山 括地志

何山亦曰金蓋山蘇子瞻遊之有詩

方輿勝覽

按何山與道場連接為北一支金蓋山是南一支汪藻記云東有道場西有何山金蓋固在道場之東南自不容混蘇子瞻詩云今古何山是勝遊亂峰縈轉繞滄洲雲含老樹明還滅石礙飛泉咽復流遍嶺烟霞迷俗客一溪風雨送歸舟自嗟塵土先衰老底事孤僧亦白頭山上有宋安定先生胡瑗墓

金蓋山故多雲氣乙未三月攜伴曉入山觀望四山繚繞如垣中間田段平行環視如在甌中受蒸潤也少焉日出雲氣漸散惟金蓋獨遲越不易解

石柱記卷三

十

予謂氣盛必有佳泉乃南涉坡陀見大楊梅樹下汨汨有聲清冷可愛急移茶具就之茶不能變其色土人言十里內蠶絲俱汲此煮之輒光白大售下注田段可百畝名曰雲泉 水品

按金蓋山在烏程縣南十二里頂常出雲諺云金蓋戴帽要雨就到農家以此為驗道場山亦名雲峰唐中和間僧如訥建伏虎道場蘋洲可談云道場在州之離方山背建一浮圖文筆峰也蘇東坡詩有道場山頂何山麓之句汪藻云遊道場者如入王侯之家過何山如造高人隱士之廬

何氏書堂圖記相承以何氏為晉何楷楷嘗讀書此山後為吳興太守以其居為寺而名其山顏魯公書杼山碑亦曰寺西南有何楷釣臺則楷嘗居此山無疑然楷之姓名於晉史無所見惟沈約宋

書敘何子平曾祖楷為晉侍中而唐林氏姓纂亦云何叡渡江生楷為晉侍中晉書稱叡有子五人獨充準有傳而不及其餘括地志謂楷為吳興太守宋書乃以楷為晉侍中豈沈約見何充嘗除侍中因誤謂充為楷抑為吳興太守後亦至侍中邪皆不得而知也

浮溪集

宋元嘉十四年張邵丘道祚共建禪幽寺於何山

即崇報禪寺

談志

按張邵字茂宗吳郡人宋元嘉中為吳興太守丘道祚不知何許人姓系姓纂諸書竝載吳興丘氏有新安太守道護建安太守道成則道祚亦郡人也

石柱記卷三

十一

石柱記箋釋卷三

張宏禧校

石柱記卷四

藍畦 鄭元慶 箋釋

岷源 江發 審定

太湖周迴四萬八千頃

太湖周三萬六千頃其千頃烏程也去縣五十里

越絕書

按吳郡續圖經云太湖吐吸江海包絡丹陽義興吳興之境其所容者大故以太稱焉七修類纂云太湖之名不一禹貢曰震澤爾雅曰具區國語曰太湖吳越春秋曰笠澤周官職方曰五湖而五湖之義亦不同吳錄云周行五百里以五湖為名川瀆記云太湖東通松江南通雲溪西通荆溪北通滬湖東通非溪凡五道謂之五湖三吳郡國志又以胥湖蠡湖洮湖滬湖四湖合太湖為五笠澤叢書云太湖上稟咸池五車之氣故一水五名曰菱湖曰莫湖曰胥湖曰游湖曰貢湖未審孰是太湖自古相傳三萬六千頃魯公何以云四萬八千頃也太湖今去烏程縣止一十八里越絕書何以云去縣五十里也王鰲姑蘇志云太湖東西二百餘里南北一百二十里占蘇湖常三州今蘇之吳吳江湖之

石柱記卷四

烏程長興常之宜興武進無錫七縣皆瀕太湖新唐書志以為占蘇宣常湖四州之境誤也明一統志亦承其誤

吳越天寶八年置都水營田使以主水事募卒為部號曰撩淺軍亦謂之撩清命於太湖旁置撩清卒四部凡七八千人專為田事治河築隄一路徑入吳淞江一路自急水港下澱山湖入海居民遇旱則運水種田澇則引水出田又開東府南湖立法甚備

十國春秋

按吳越錢氏在東南專享水利是時歲屢稔錢五十文糴米一石自歸宋後農政不修田圍河港大半毀壞然田稅每畝不過一斗現社宗廟上巡撫民猶易辦自景定四年賈似道創買公田之說浙西六郡買田至三百五十餘萬頃姑蘇志云宋之田有曰公田每畝起租上自一石五斗下至七斗七升四合曰圍田租四斗或三斗曰沙田租三斗或二斗曰成田納糧二斗曰營田租四斗或三斗二斗曰職田上自八斗七升下至六斗三合五勺曰常平田曰義役田曰社倉田曰局官租田曰養濟局田曰居養院田曰囚糧田曰沒官田科高下有差高者不踰一石五斗

下至二斗夫園田沙田成田皆民田也其餘皆官田也故宋史有一曰
公田之賦一曰民田之賦元有天下取之江南者曰夏稅曰秋稅而不
言官民田之分日知錄云元之重租田皆別領於官松江府志言元時
苗稅公田外復有江淮財賦都總管府又有江浙財賦府各領官田籍
沒田皆不繫州縣元額而元史所記賜田大臣無不以平江等處是時
官田甚多張士誠竊據姑蘇明太祖命大將軍徐達等統兵攻之相抗
十餘年太祖怒其城久不下惡民之附寇籍沒義兵頭目田及給賜功
臣田以租簿付之有司照租為稅額每畝科糧七斗五升及一石以上
其民田仍不過五升起科具載從信錄及周文襄年譜又富民沈萬三
等多以事被籍而浙西之官田多而益多此三吳重賦之大凡也再按
宋史吾湖當景定時臨安府通判陳嘗催督謝奕燾趙與嘗王唐珪馬
元演等至州買田獨多又按明太祖實錄及平吳錄元至正十六年四
月壬子張士誠將趙打虎陷湖州有烏程歸安德清武康四縣地十七
年二月丙午朔太祖遣耿炳文劉成自廣德取長興九月丙戌廣興翼
元帥費子賢率兵取武康十八年元帥費子愚總管張德下安吉各築
城相持且戰且守者十年至丙午年十月始下湖州太祖之怒自不能
免以故烏程歸安德清三縣田糧比長興安吉武康三縣獨多此其明
驗也又洪武間南潯富民沈富璉市沈明前坵馮璋士林金鈿俱以廣
貲被籍湖州沒官田又最多孝陵雖有減租之詔七斗五升至四斗四
升者不過減十之二民困未甦然其時建都金陵糧運不遠耗輕易舉
及遷北平轉輸煩費民不堪命宣德五年侍郎周忱巡撫南直隸兼管
嘉湖二府始於額外加徵耗米用以充軍支運其法正糧一石加耗七

石柱記卷四

二

斗而支允遠近就中伸縮有差於是民得免遠漕之苦法行至今所謂
稅糧改為增耗者此也是時田土起科尚分官民等則官田自重至輕
凡五百九十九則民田自輕入重凡三千八百四十一則夫民田以已
業稅輕輕之極畝止五升而耗之增也無幾官田以承佃稅重重之極
畝至七斗而耗之增也益多雖嘗調劑其間重者準折金花輕者盡派
白糧而則之名目既眾下之姦弊日繁鬻業者既減額以求售豪強者
復行賄以游移版籍同彼絲棼訟牒幾至山積於是景泰二年從浙江
右布政使楊瓚之言將湖州官田重租分派民田輕租之家承納正德
十五年湖州知府劉天和議將官民田各均為一則嘉靖二十年知府
張鐸又議將官民田共均為一則從此官民田混而為一相沿至今欲
知何者為官田何者為民田民田仍舊輕科官田籲恩減額而冊籍無
憑顛連莫告甚矣湖州民力之不支也禹貢揚州厥土惟塗泥厥田惟
下下厥賦下上錯而今何如哉祝枝山前聞有云三吳在古其民皆
斷髮文身以與蛟龍雜處若空其地為最下也今財賦日煩而古之遺
跡不異其水之不為害者天幸爾萬
一泔水不知何以處之吁可畏哉

太湖有沿湖之隄多為淒淒有斗門制以巨木甚
固門各有牐版旱則閉之以防溪水之走洩有東
北風亦閉之以防湖水之暴漲舟行且有所檣泊

官主其事為利浩博後漸堙廢頗為郡害予觀蘇東坡水利奏議云太湖受諸州之水先治吳江南岸芟葑蘆葦之積則水東瀉而無壅滯之患諸州利矣今吳江芟葦屯結尤甚皆成圩田其長橋諸洞湮塞殆盡近來十水九滄不可救捍後之治水者宜究心當先務也

談志

烏程縣水總瀦之地為太湖瀉水之口小梅以東凡八西金港顧家港官瀆港張家港宣家港楊瀆港泥橋港寺橋港大錢以東凡二十八計家港湯漚沈漚和尚漚羅漚大漚新涇漚潘漚諸漚張港漚幻湖漚西金漚東金漚許漚楊漚謝漚義高漚

石柱記卷四

三

陳漚薄漚五浦漚蔣漚錢漚新浦漚石橋漚盛漚

宋漚喬漚胡漚

烏程唐志

長興沿湖水口凡三十有四斯圻港響水澗金村港蘇家港上周港長大港夾浦港謝莊港丁家港雞籠港大陳瀆杭瀆港石屑港莫家港盧瀆港金雞港新塘港徐家港百步港竹篠港殷瀆港楊家浦福緣港石瀆港新開港花橋港坍涇港蘆圻港白茅港竇瀆港涇山港小陳瀆蔡浦港小梅港

圖考

按宋程大昌修湖漚記云湖漚三十有六其九屬吳江其二十七屬烏程惟計家港近溪而闊獨不置聞紹興二年知州事王回修之又改二十七漚名曰豐登稔熟康寧安樂瑞慶福禧和裕阜通惠澤吉利泰興富足固益濟而皆冠以常字明沈肱水利考云長興荆溪以下洩入太

湖之港凡三十有四舊傳七十有二吳越錢氏時港各有閘年久湮廢所存止此古今稱謂不同不可考伍餘福三吳水利考云諸淩界烏程長興之間岐而視之烏程三十九長興三十四總而計之共七十有三其圖畫所載名號古今不同訪之父老亦罕有知其詳者今大半湮塞湖濱居民嘗有自捐已資開濬深廣置閘啓閉之議而格於時勢事不果行

環湖之水悉注于太湖微太湖民其魚乎所謂導

水以疾趨太湖者水之道也決之而已矣議者謂木簾魚斷椿

漚之類皆能壅水亦一說也至于決太湖之水以放于海其事固在

蘇松張鐸府志

明永樂中夏公原吉治水東南有功吳人尸祝之

正統間勢家奪水利溝防盡壞周文襄公治之纔

十餘年又壞景泰中李侍郎敏治之弘治中又壞

徐侍郎貫治之正德末又壞李尚書克嗣治之隆

石柱記卷四

四

慶中又壞海忠介公治之明名臣言行錄

按隆慶三年忠介公因饑興役借支軍餉及各處贓罰導河夫等銀五萬有奇開南倉口至黃渡平陸六十餘里後十年巡江御史林應訓開黃渡以西千墩上流三十餘里江亦加闊又三年副使許應逵奉勅開江求通及塞內帑十萬盡付東流海公遺跡不二十年復為平陸厥後巡撫曹時聘周啓元張國維巡按馬從聘薛貞歷有咨議費大莫舉

崇禎元年員外蔡懋德疏言三吳水利輔臣亦有

吳人為上言之上疑其勞民命撫臣議撫臣李待

問適以擢漕督將去謂挑濬不可已然人有言三

江總開一勞永逸者有言物力難措先開吳淞江

而後徐議之者有言且就內河疏導其溝澮者而

皆苦於費無所措上輒罷之上初念恐其勞民疑

士大夫自為反以厲民耳惜無有為上言勞民所

以利民雖小費而東南財賦之地國計根本則未
有不汲汲行之者矣

暇老齋
雜記

按三吳之水利在下流而吾湖之水利在淩港自宋迄元代有治績載
在史冊明洪武廿七年遣國子生人才分詣天下郡縣督吏民修治水
利廿八年奏開天下郡縣塘堰凡四萬九百八十七處河四千一百六
十二處陂渠隄岸五千四十八處載在實錄時烏程縣主簿王福審三
十六淩港後典史姚章繼為之永樂以後自監司以及郡縣俱設有水
利官專治農事每圩編立塘長即其有田者充之歲以農隙官率塘長
循行阡陌間督其築修圩塍開治水道水旱之歲責其啓閉溝缺時其
守護而檢報災數焉迨至中葉農政不修水利官漸次裁去所謂塘長
者徒以勾攝公事起滅詞訟而已遑聞其為水利哉近年沈樂存侍御
上疏請開太湖下流并淩港章下所司勘覆不行因作東南水利編大
指以為湖水為患要在疏橋口以出江濬江以達海而湖州所屬各
淩港築隄置閘以捍風濤亦與疏濬相表裏要言不煩可當石畫也

湖州當澤國上游其為民政莫要於水利故安定
先生在湖學特設水利一齋以教士子當時劉彙
遂以水利名於官後世乃不講此是豈有用之學

石柱記卷四

五

哉且太湖受天目諸山之水其治之之法不患源
之不通而患流之不洩故蘇松興利之處即吳興
去害之所由也近自吳江垂虹湮塞之後而吳興
之害加甚為政者當思其洩水之處不必企仰於
垂虹則凡所以思患預防多為之慮立必守之法
資無窮之利庶幾不失安定先生立教之意則東
南民力雖窮猶可勉為奔命以供賦役此區區屬
望之念尤所加意云

吳興掌
故集

康熙三十八年四月初四日

上幸太湖準吳縣百姓奏水東地方產去糧存

上問扈駕守備牛斗太湖幅員廣狹對周迴八百五里

上云為何具區志上止五百里對積年風浪衝攤隄岸
故今有八百餘里

上問去了許多地地方官何不奏聞開除對非但水東
一處即如烏程之胡漚長興之白茅崙宜興之東
塘武進之新村無錫之沙灣長洲之貢湖吳江之
七里港處處有之

上云朕不到江南民間疾苦焉得知道

太湖扈駕恭紀

按太湖舊稱三萬六千頃魯公志已四萬八千頃矣水經注引韋昭云方員五百里牛斗所對又八百五里矣可見積年風浪蓋去隄岸不知其凡幾也產去糧存之所民困極矣安能如水東成例一槩邀恩豁免也

霅溪

霅溪在烏程縣東南一里凡四水合為一溪自廣

石柱記卷四

六

苕山曰苕溪自銅峴山曰前溪自天目山曰餘不

溪自德清縣前北流至州南興國寺前曰霅溪東

北流入太湖興國寺今廢為霅溪館

太平寰宇記

按霅溪之水東北過駱駝橋直出臨湖門分流於北者經奉勝門趨小梅港出太湖分流於東者折而北大會諸水於昆山澆直北趨大錢港出太湖又自駱駝橋南折而東過倉橋又東至歸安縣前過花樓橋直出迎春門東過八里店又東過舊館又東過南潯鎮入吳江平望之豐脰湖霅溪館即白蘋館梁太守蕭琛建顏魯公改為霅溪館館後有碧瀾堂唐大中四年刺史杜牧建書史會要云牧善行書亦能大字嘗有分書碧瀾堂三字在湖州驛經二尺許茂密滿榜都欲滅縫世少識之紹興續編到四庫闕書目有碧瀾堂詩一卷墨妙亭有張逸碧瀾詩石刻今並不存駱駝橋唐垂拱元年造顏魯公書額東坡詩注以橋形似駱駝背名之談志云取駱駝知水性以鎮水非以形也劉禹錫詩駱駝橋上蘋風起鸚鵡杯中若下春蘇軾詩今日駱駝橋下泊恣看修網出銀刀昆山當城北突然獨峙吳興之水口也山上舊有亭梁太守柳惲所創明一統志訛作唐之柳渾渾惲之六世孫也王氏讀史訂疑嘗辨證之倉橋舊名採蘋橋元時橋南有倉因改稱之花樓橋舊名人依橋最高偽吳時刻平之覆以樓故曰花樓

唐韻霽水泉流之聲霽霽然三吳土地記云烏程縣東南有霽溪水至深處徐陵孝義寺碑云清霽瀾瀾深窮地根又字書霽者四水激射之聲故徐仲謀詩四水交流霽霽聲張世奕詩霽溪深極地根清四派交流激射聲李直方白蘋洲記五溪叢流而導其氣說者謂四水并霽水而五也鄭戩浮玉亭記霽水合四水則四水為霽有自來矣談志

按輿地紀勝引皇朝郡縣志云自清源門入曰苔溪其流濁自定安門入曰霽溪其流清不過二溪耳且餘不溪與苔溪皆出天目山前溪雖出銅峴山然至德清縣東已與餘不溪合而北流至定安門外通謂之霽溪不待與苔溪合然後名之其說又與談志相左矣予據諸書考之知郡中之水自西來者曰苔溪入清源門東過儀鳳橋唐儀鳳中造橋下曰儀鳳橋至於江渚匯自南來者曰前溪曰餘不溪曰北流水三水會於峴山漾入定安門過潮音橋折為前溪匯亦唐時造宋建炎末折而為二南曰甘棠北仍曰長橋至於江渚匯然水晶宮也從月河西北隅過長橋

石柱記卷四

七

後謂之霽溪今人誤以打糞灣為倒霽灣謂霽水自南來又誤以開水橋為霽水橋謂霽水自西來至於苔水發源廣苔在天目山之陰湧幢小品云廣苔遍山生苔望之翩翩作鳳尾形苔水出焉自頂及麓處處涌溢山水草合而為一以此稱奇此苔之所由名也今人傳會苔水自南來初為南苔之號殊不知山海經言浮玉之山苔水出於其陰而未嘗言出於其陽也談志云統紀載興國寺在霽溪館西霽溪館今雙溪亭是也而烏程縣南浮玉亭舊名霽水堂縣西有霽水鄉二處所臨乃是苔水今餘杭乃有苔溪館定安門內有四水亭皆相承之誤

湖州城中之水曰霽溪以四水奔會激射霽然有

聲故名

薛氏浙江通志

按太平御覽引輿地志云霽水亦若水之異名也水深不可測俗謂之若水又山海經浮玉之山苔水出其陰中多鱉魚今亦謂之霽烏山也殊屬費解唐一菴作烏程歸安二縣志俱云霽溪合苔溪前溪餘不溪北流水四水相合霽然有聲故名與談氏薛氏之說相合

霽溪即江子匯在郡治南其源自南來者曰前溪曰餘不溪曰北流水三水會於峴山漾入定安門自西來者曰苔溪入清源門四水總聚於江子匯

雪霅然有聲謂之雪溪又名雪川

水利考

雪川平波漫流有水之利而無水之害羣山環列
秀氣可掬卜居於此殆復何加諺云放你生放你
命放你湖州作去聲百姓此唐末五代之語是時天
下皆被兵獨湖州獲免至於本朝太平又二百年
靖康建炎復免兵厄今尚有唐末五代時屋宇夫
為湖之百姓猶為至幸况為士大夫乎

經鉅堂雜志

按唐宋之時湖之百姓為生人至幸今大不然菰城文獻云湖民最苦四體焦瘁終歲不休無產者雇倩受直盡心彈力謂之長工夏秋農忙短假應事謂之忙工收穫之際公私責償而場遽空者十恒七八婦人事蠶夏初餵葉晝夜毋怠三眠之後繭白如山下繭繅絲辛勤備至至於買絲而終身無得一繭者殆將遍於村落矣

白蘋洲

石柱記卷四

八

經典言蘋者多先儒罕有解釋毛詩草木疏亦未
為分了而湖州圖經謂之不滑之蓴大謬矣爾雅
釋草云蘋大萍左傳云蘋蘩蘊藻之菜然則蘋為
萍類根不隨泥生於水上今人呼為浮菜者是也
入夏有花其色正白故謂之白蘋或曰蘋花夏生
而柳惲詩汀洲採白蘋日莫江南春何也荅曰以
蘋花色白故通無之時亦可呼為白蘋也

兼明書

白蘋洲在雪溪東南去州一里有顏魯公芳菲亭
洲內有池池中有千葉蓮今惟地名故址存焉

寰宇記

按魯公年譜白蘋洲上公作八角亭及茅亭不聞有芳菲亭也寰宇記或有所本樹萱錄云張確嘗遊雪上於白蘋洲見二碧衣女子攜手吟

詠云碧水色堪染白蓮香正濃分飛俱有恨此別幾時逢瀟隱玲瓏玉
花藏縹緲容何當假雙翼聲影暫相從確逐之化為翡翠飛去又珍珠
船云湖州碧瀾堂素有奇怪宋郡士晁子芝嘗見一女子踏波而吟曰
水天日暮風無力斷雲影裏蘆花色折得芙蓉水上游兩鬢蕭蕭玉釵
直吟畢由東岸而去或曰此皆水仙也吾不敢信姑存之以資談柄可
也地名故址者即今之蓮花莊也爾雅荷芙蓉其莖茄其葉蓮其本莖
其華菡萏其實蓮其根藕其中的的中意今俗荷皆謂之蓮千葉蓮者
不但以實為華且以華為葉矣會昌一品集重臺芙蓉賦序云吳興郡
南白蘋亭有重臺芙蓉本生於長城章后舊居之側移植蘋洲至今茂
盛郭璞注荷別名芙蓉江東呼荷本草衍義云荷花粉紅千葉白千葉
者皆不實姜堯章云吳興號水晶宮荷花盛麗陳簡齋詞今年何以報
君恩一路繇花相送到青墩蘇東坡守湖時與王郎昆仲及兒子過遠
城觀荷花詩云環城三十里處處
皆奇絕浦荷浩如海時見舟一葉

唐刺史楊漢公疏四渠濬二池立三園建五亭以
復顏真卿之舊白居易為文以記曰以其架大溪
跨長汀者謂之白蘋亭介二園開百卉者謂之集
芳亭面廣池目列岫者謂之山光亭翫晨曦者謂

石柱記卷四

九

之朝霞亭狎清漣者謂之碧波亭其建置也始則
太守柳公濫觴之次則顏公推輪之終則楊公繪
素之又曰五亭閒開萬象迭入今五亭已不存五
亭碑記白居易撰馬縝書開成四年建白蘋亭碑
記李直方撰史鎬書元和元年建俱在墨妙亭白
蘋洲碑記在州大廳壁中中和五年刺史孫儲撰
進士王溥書

輿地
紀勝

吳興山水清遠城據其會狀其景者曰水晶宮

楊漢

公詩吳興城闕水雲中画舫青簾處處
通溪上玉樓樓上月清光合作水晶宮

曰水雲鄉

王唯正詩苕溪水
雲鄉蘇東坡詩方

文仙人出渺茫高
情猶愛水雲鄉

曰極樂國

林希上地圖詩遠郭芙蓉拍岸平花深
蕩槩不聞聲萬家笑語荷花裏知是人

間極城之內觸處見山觸處可以引溪流

俞秀老詩沽酒
店穿斜巷出探

蓮船後門歸翠沾城郭山千點清醮樓臺水一圍故凡為苑圃必景物幽雅雖近

市如在雲巖江村所以為趣也唐開成中白蘋洲有三園錢氏時清源門內有芳菲園國朝寶元中定安門內有南園今廢為庾廩矣居宅矣招提矣園之亭館自白蘋外俱不可見鄉老寓公多為芳圃亭宇相望沿沚旁聯花木蓊茂游者爭眩物固不能兩盛也談志

白蘋洲考其名始於柳太守之詩至顏魯公為郡始葺八角亭後楊漢公拓為五亭至光啓中李師悅廢而為倉宋朝以為秀王大府至元泰定復為倉今為弘文館李直方白蘋洲記乃謂吳江之南震澤之

陰為湖州已謬至云洲在郡城東南則又似列於城外明洪武中土人有作記者乃云在江子匯之西尤謬矣吳興掌故集

按癸辛雜識云吳興郡中二溪橫貫此天下之所無故在在多園池之勝予嘗聞之善游者言足跡遍天下而城垣以內之水有溪有澗有河有瀆有潭有洲未有如吳興之深且廣者厓岸多生紅蓼曰紅蓼灘曲洧舊聞云紅蓼即詩所謂游龍也俗呼水紅詩傳云龍紅草箋云游龍猶放縱也紅草放縱枝葉於隰中疏云一名馬蓼葉大而赤白色生水澤中高丈餘今月河蓮莊一帶蓼紅蘋白當夏秋之交花影參覃水光斂豔編舟泛焉不減武陵源也

石柱記箋釋卷四

徐秋萼校

石柱記卷五

蒞畦 鄭元慶 箋釋

孫臣 徐弘謀 審定

德清縣

德清天授二年分武康置武源縣景雲二年改為

臨溪天寶元年改為德清縣舊唐書

唐初置武源縣縣治在下蘭山南天寶中改德清

移置於百寮山南談志

市亭山

市亭山在縣西南二百步王敬弘涖郡欲此立宅

以其面谿背山也吳興記

石柱記卷五

古十里一亭以寓止賓旅因以名山圖經

按宋書王敬弘晉末以太尉從事中郎出為吳興太守尋拜侍中入宋歷左光祿大夫開府儀同三司致仕隱居餘杭舍亭山德清在宋齊之間正并入餘杭故德清之市亭山即餘杭之舍亭山也吳興記以敬弘作逸少誤今正之

金鷺山

金鷺山上有池深五尺其水冬夏不竭時有金鷺

翔集或風清雨霽樵夫耕父聞山上鷺鳴山墟名

按金鷺山在縣西北五里談志云後漢海昏侯沈戎于永平元年葬金鷺山葬時金鷺飛集三鳴而去童謡云金鷺鳴沈氏興代代出公卿遂更名其山曰金鷺今山南有三村號上初鳴中初鳴下初鳴山上有沈氏祖德碑記梁天監癸未春三月系孫麟士述唐大曆癸丑冬十二月刺史顏真卿撰碑陰記二記文多不載復齋碑錄云沈氏述祖德碑并碑陰下半缺不見書撰人名氏大曆八年十二月立德清陳志云梁沈氏祖德碑沈麟士製立之金鷺山忽有樹生其龜股間盤旋夾持碑有所倚巖然不動號慶樹碑後裂為十六段藏之縣帑今無一存焉者矣再按山上有四墓一沈戎一尚書令沈禮一河間相沈景一荊州刺史沈彥統記載沈氏先賢傳諸書云沈戎子孫見史傳者一百五十八人

三十八人有正傳一百二十人附傳宋梁陳間皇后三人尚主者五人唐睿真太后亦吳興人至今人物稱盛金鵝發祥地理果不爽乎

吳羌山

漢高士吳羌避王莽之亂寓居此山後人名焉宋沈麟士講經教授於此從學者數百人時為語曰

吳羌山中有賢士閉門教授居成市入東記

縣東南一里吳羌山俗呼乾元山當縣而峙蓋邑

之鎮也山之陽有織簾先生祠祀名賢沈麟士麟

士織簾為業時稱織簾先生卒後鄉人重之即其

隱居立廟廟前古井相傳先生舊井廟後其墓在

焉德清陳志

按吳羌山之陰枕餘不溪沈麟士隱居於此南史云麟士居吳羌山南齊書亦云居餘不溪吳羌山以羌為差以餘不為餘干殆傳寫之譌邑中

石柱記卷五

胡朏明先生語予曰安知非以吳王夫差得名則又不敢臆斷也

餘不溪

餘不溪在縣南一百步沈氏家傳云後漢沈戎居

烏程餘不鄉即此類要

餘不溪水清與餘溪不類如會稽秦望其山秀發

餘山莫與等也太平寰宇記

餘不溪出天目山之陽經臨安縣又經餘杭縣至

安溪奉口經德清縣折而東北至敢山過菱湖及

湖蚨漾又西北會前溪水至峴山漾入定安門至

江子匯為霅溪談志

按留青日札云不作秋韻方鳩切非也當作虞韻風無切本作樹說文鄂足也草木房為樹一曰花下萼通作不詩棠棣之華鄂不韡韡鄭注

承華者鄂不當作柎鄂足也即今言花帶也此地有荃溪其流相通故曰餘英餘不其義可見若作方鳩切則本注說文云不鳥下翔不下來也與溪水全不干涉李宗諤圖經及寰宇記通作方鳩切

北流水

北流水在德清縣前其水從餘不溪至縣東分派折入清河橋下北流至沙村與武康前溪水合又北至峴山漾與餘不溪合入定安門至江子匯為

霽溪談志

苧溪

苧溪在縣東二十五里山墟名云苧溪以貢苧為名南岸有蘭相如廟北岸有青州刺史姚恢囚女

城太平寰宇記

石柱記卷五

三

按通典云湖州貢苧布三十端通志略云湖州貢白苧布則唐時所貢之苧本出於此又按相如趙人當戰國時未嘗游行至此縣有蘭村溪南有廟未審何故入東記云後漢姚恢與海昏侯沈戎為婚過江陰欲於柯田山居之恢女密報戎戎先居焉姚氏三代不養女有女則囚於此山後人因呼為囚女山其說誕甚不足信

餘不亭侯廟

孔愉字敬康山陰人建興初除駙馬都尉參丞相軍國事討華軼功封餘不亭侯嘗行經餘不溪見籠龜於路者愉買而放之龜中流左顧者數四及是鑄侯印而印龜左顧三鑄如初印工以告愉乃悟遂佩焉累遷吳興太守沈充反愉棄官還京師歷會稽內史散騎常侍卒贈車騎將軍開府儀同

三司謚曰貞晉書

餘不亭侯廟在德清縣東南二百步自晉迄宋廟

食不絕談志

按縣西南城山之陽亦有孔侯廟圖經云愉從子嚴為吳興太守後人立廟於此舊圖經云即愉也縣南之廟乃祭祀之處此則墓前祠堂餘不志亦云孔侯墓之祠堂後人因以為廟廟後有大家上有古木數株堅如鐵石故老相傳愉葬後龜銜窠木種於此至今號龜銜樹驂鸞錄云范至能嘗道龜溪登覽於廟時見愉之像席地而坐廟前古柏合抱焉今像設據榻而古柏絕無則知廟非唐宋之故矣

梁吏部尚書沈約墓

沈約字休文武康人仕宋至尚書度支郎齊初為征虜記室帶襄陽令事文惠太子歷司徒左長史進號征虜將軍南清河太守佐蕭衍篡位弒齊和帝梁臺建為尚書左僕射封建昌縣侯累加特進光祿侍中太傅卒有司謚曰文帝曰懷情不盡曰

石柱記卷五

四

隱故改謚隱梁書

孝鵝冢

唐天寶末邑人武義主簿沈朝家養母鵝一因育卵腸出乃自驚鳴鼓翅竄於波渚之隅其長雛悲叫屢絕家人飼之水穀不復飲啄及母鵝死雛仰天號切遂取倉舍下敗薦以覆其母銜庭砌間芻草列於母所若人之祭奠長吁數聲而死沈氏家人因作二函葬於山中土人呼為孝鵝冢

太平寰宇記

按一統志列孝鵝冢在長興縣東蔣灣者非也沈約歷事三朝恬不知恥至弒其君而不顧真禽獸之不若矣其謚曰隱隱者貶辭吳興故有地主廟祀吳文帝而約竊冒之扁曰隱侯祠春秋血食祀典之濫也夏明誠嘗作八詠樓賦序直斥沈約詩為是樓之辱人服其卓見寰宇記類要俱志其墓不明著所在胡宿詩注云在縣之蘭村湖廣通志云約卒於荊門州墓在州西墓銘云時日不利不能歸葬則是約之墓終無

定所也竹垞先生補志其墓與
鷺冢竝列約其有知能不恧而

武康縣

吳興武康令吳分烏程餘杭立永安縣晉太康元
年更名宋書

武康平陳廢仁壽二年復有封嵎山青山白鵠山

隋書

按封嵎即封禺二山也青山縣北一十
五里白鵠山縣西北十里一名鵠山

武康上李子通置安州又曰武州武德四年平子
通因之七年州廢縣隸湖州有封山有銅新唐書

縣治舊在餘英溪北隋移溪南唐仍治溪北談志

防風山

石柱記卷五

五

防風山在縣東一十八里先名封禺山唐天寶六
年敕改焉一名風公山一名風渚山古防風氏之
國公者以山上有風公洞渚者以山下有風渚湖
封山者以其禁采樵漁獵也山東南二里曰禺山
禹十二代孫帝禹所居輿地志云古防風氏之都
也太平寰宇記

吳伐越隳會稽獲骨一節專車吳子使來好聘問
之仲尼仲尼曰丘聞之禹致羣臣于會稽之山防
風氏後至殺而戮之其骨專車焉此為大矣客曰
敢問誰守為神仲尼曰山川之靈足以紀綱天下
者其守為神社稷之守為公侯皆屬于王客曰防

風何守仲尼曰汪芒氏之君守封禺之山者也為漆姓在虞夏商為汪芒氏于周為長翟今為大人客曰人長之極幾何仲尼曰焦僥氏長三尺短之至也長者不過丈數之極也

國語

按防風氏有廟在封禺二山之間晉元康中縣令賀循立述異記云防風廟土木形其貌龍首牛耳連者一目

武康山

武康山在縣西一十五里舊名銅官山唐天寶六年敕改焉輿地志云山下有兩坎深數丈方圓百丈古采銅處有趙監廟漢吳王濞鑿山采銅銅監趙氏遇山崩壓死降靈於此後人立廟

太平寰宇記

按舊志郡中亦有銅官趙監廟在烏盆巷口與長橋相直後唐同光中敕封通靈王却掃編云銅官廟中偶像衣冠甚古其婦人皆如世所藏

石柱記卷五

六

周昉畫人物蓋唐人之遺蹟也翟公巽尤愛之多至廟中觀焉往往徘徊終日今訛作漢壽亭侯祠

七里嶠

七里嶠山頂有石橋長一丈六尺甚峻滑一名石

橋山

山墟名

石嶠山在縣西南四里

一統志

七里嶠度其圍以表山也南有嶠嶺過嶺而東為康城又北為烏龍山南為寨山中有畝曰寨山畝有祠焉兜鍪被甲執戈而坐其神曰嚴康相傳康屯兵處人代莫詳野老之言曰康邑人也奇醜而力爪牙為兵革膚為鐵刀鏃莫之刺也唯喉三寸肉耳妻曰鮑三孃美而勇夫婦各治兵為幕府今

姚塢關內鮑家莊有三孃遺壘時有花關索者年
少美容儀鮑悅而私之矢貫康喉而噎至今村莊
雜劇演其遺事而康城廟像歲祀夫婦二人別祀
索於何村獨無匹里人號曰孤土地廟云康怙力
強死世祀里社鮑淫奔殺夫鬼復配享花竊妻暴
行祠宇相望是崇姦教亂也何以風世且康不能
厲廟不為災意者傳聞乖實乎姑志之以廣風土

之異聞

前溪
逸志

按陝西通志商南縣有廉康太子墓世傳太子三國時人炎祚衰微據
土僭號為關鎖所平歸安縣西南七十五里有廉山新志注云廉康太
子墓在此不知何據烏程北山亦有鮑三孃屯兵處俚俗相傳三孃為
花關索所平如前溪逸志所云略同嚴廉索鎖其音騷騷何適與秦志
相類邪總之湖俗信鬼神好淫祠山之麓水之涯有村落必有廟宇奉
一神以主香火而好事者遂至訛傳周彭祖安吉人齊管仲烏程棲賢

石柱記卷五

七

山人晏嬰長興晏子鄉人吳伍員烏程伍村人燕荆軻長興荆溪人趙
蘭相如德清蘭村人漢樊噲武康上柏人晉王衍歸安千金人郭巨孝
豐鄉人紛紛傳會唐宋以後更指不勝屈修
志者並不考覈混書之惑人耳目吁可怪也

前溪

前溪者古永安縣前之溪也晉車騎將軍沈充家
此樂府有前溪曲充自製詞云當曙復未曙百鳥
啼恩恩後宋少帝續為七曲其一云憂思出門倚
逢郎前溪渡莫作流水心引新都舍故

統紀

前溪一名餘英溪每春夾岸花開通夏不歇

山墟
名

前溪在縣南一百步其源出銅峴山東流四十九
里至縣前千秋橋又東至縣學前分為二派其一
北流經黃隴山又東至沙村號沙溪與德清縣北

流水合入郡之定安門經前溪匯

在慈感寺前

至雲溪其

一東流經下渚湖之南會於餘不溪武康縣後又

有一溪亦出銅峴山謂之後溪

談志

于兢大唐傳德清縣南前溪村南朝習樂之處今尚有數百家習音樂江南聲伎多自此出所謂舞出前溪者也復齋漫錄言陳劉刪詩山邊歌落日池上舞前溪唐崔顥詩舞愛前溪妙歌憐子夜長按智匠古今樂錄晉車騎將軍沈充作前溪曲非舞也蓋復齋不曾見于兢大唐傳故不知舞出前

溪耳

漁隱叢話

阮公溪

石柱記卷五

八

石靈寶者會稽上虞人寓武康其女有殊色天監元年選為采女及生元帝為修容賜姓阮氏拜其父為奉朝請時人名所居溪為阮公溪靈寶以承聖二年追封武康侯溪中有大青石俗謂之美女

石

梁陳故事

阮公溪在縣西十五里與餘英溪連接

太平寰宇記

郭先生祠堂

武康有郭文先生廟堂

九域志

郭先生祠堂在縣北郭林村晉郭文也文河內軹人中原亂避地江南居此謝安聞其名延至西園祠南有郭林橋西有招賢山皆其遊息之地

談志

沈道虔石山精舍

沈道虔字汝恭武康人性仁愛好老易居縣北石山下與孤兄子共釜庾之資困不改節州辟凡十三命皆不就宋太祖遣使存問賜錢三萬米二百斛悉供孤兄子嫁娶徵為員外散騎侍郎不赴敕州郡隨時問遺元嘉二十六年卒

宋書按一統志石山在縣北二十里沈道虔隱居石山精舍即此太平寰宇記云精舍在石城山縣西南三里者非也

吳太常卿姚信墓

漢青州刺史姚恢尚書左僕射姚皓吳太常卿姚信三墓俱在石城山景德中碑碣尚存

談志按阮孝緒云姚信字元直吳興人吳太常卿陸德明云信字德祐未知孰是隋經籍志信有易注十卷集二卷錄一卷唐藝文志作十卷士緯

十卷新書二卷三國志陸績傳注有表請賜績女鬱生以義姑之號又陸遜傳姚信以親附太子枉見流徙又孫皓傳寶鼎二年十二月遣守丞相孟仁太常姚信等備官僚中軍步騎二千人以靈輿法駕東迎神於明陵又南史姚察傳讓選部書云臣九世祖信名高往代信有戒子書及昕天論載吳興藝文補九域志載姚信丁固二墓寰宇記亦載固墓按丁固葬餘杭縣西丁橋北山下見宋咸淳臨安志

晉吏部尚書沈嘉墓

沈嘉墓在縣東一十五里鳳皇山山下有皇覺寺

漢沈戎故宅也

談志按嘉字長茂武康人善草書仕晉為吳興太守重開菽塘人獲其利歷吏部尚書卒

晉揚威將軍東陽太守沈勁墓

沈勁字世堅武康人哀父克死於非義志欲雪恥年三十餘以刑家不得仕進郡將王胡之器之及遷鎮洛陽表為參軍升平中慕容恪侵逼山陵勁

求効力補冠軍長史令自募壯士擊賊會許昌寇
逼將軍陳祐率衆而東留勁以五百人守洛陽恪
攻城城陷被執勁神氣自若恪殺之事聞贈東陽
太守子赤黔官至大長秋廷尉卿孫叔任官至建
威將軍益州刺史晉書
沈勁墓在小山赤黔祔焉談志
宋吏部尚書吉陽侯沈演之墓

沈演之字臺真武康人祖赤黔父叔任演之折節
好學以義理業尚知名襲父別爵吉陽縣五等侯
舉秀才歷嘉興錢塘武康令俱有能名元嘉十二
年東南諸郡大水演之為散騎常侍巡行拯恤百

姓蒙賴屢遷左衛將軍與范曄等掌禁旅同參機
密加侍中歷吏部尚書太子右衛率卒贈紫金光
祿大夫謚曰貞侯宋書

演之墓在小山談志

石柱記箋釋卷五

姪大奎

全校

男惟鞠

